

Nkalaŋ ní bwâm míme Yesuε ngáne

Jɔnε

átélé

Ndibned ní kálag

Nkalaŋ ní bwâm ngáne Jɔnε átélé nílúmte aá Yesuε adíi Eyale é Dyõb éche édé á ngíndé ne á ngíndé. Echê Eyale êntim moonyonj édyēē-’ε átíntê e bad. Mmén nkalaŋ, Jɔnε atelé mó ábel bad ábe béléa mó bédúbe nén bán Yesuε, Mwän a Dyõb mó adé Nsoode awě Dyõb dénhõbpē aá móṣlõm. Anlúméd-tε aá nzé bad bédúbpé mó békũd e’soosonj.

A kálag tē wén á mbooted, Jɔnε alúmte ngáne baahõg béndübēē Yesuε békwentén-ne áhíd mó, álúmtē-’ε ngáne bémpēe-’ε bétãngánnáá mó, béekwentene-’ε mó adúbe. E’pɛd 13-17 é’hõbe tãngene abé áde Yesuε ne ábē bembapεε bémbeē põndé esyáál kááŋ ne epun éche békóbé mó ne mam míme ánlāá’é bó ene põndé esyáál. Jɔnε ahóbé ámpē aá nzé mod adúbpé Krĩstəə äkũd alongé áde déemaá’.

Nkabtéd ní kálag

Ndibned 1.1-18

Jɔnε, Ndusenε ne bembapεε bé’sõ ábe Yesuε 1.19-51

Nsón míme Yesuε 2.1-12.50

E’pun bé asóg ábe Yesuε á Jerusalem ne benben ne Jerusalem 13.1-19.42

Mpuu míme Sãngwéé ne alúmed áde álúmtáá bad yãl 20.1-31

Nsógten: Yesuε alúmté yãl ámpē á Galilia 21.1-25

Eyale êntim moonyon

¹ A mbooted, byánán Dyöb déhăg nköŋsé Eyale êmmad abé. Eyale émbē ne Dyöb. Echê Eyale ébédéε Dyöb. ² Káŋse á mbooted Eyale émbē hōm ahóg ne Dyöb. ³ Dyöb dêmbenléd échê Eyale âhăg bwēm é'syā̄l. Chōm ké ehóg éesaá éche Dyöb dēnhăgké ésebé ne Eyale. ⁴ Alongé ásyā̄l dénhū ne Eyale, ádê alongé dó-'aá apíínédé baányon e'nyínen bé ekíde. ⁵ Abê e'nyínen bé ekíde é'pene' á ehíntén-tê, ehíntén éehēlēē bō abóded.*

⁶ Mod nhóg ampě awē Dyöb dénlōmmē. Dīn démbē mó bán Jone. ⁷ Jone ampě áláa bad tâŋgene ábê e'nyínen bé ekíde, âbel nēn bad bésyā̄l béwōg, bédúbe-ε. ⁸ Saké mwēn abédé ábê e'nyínen bé ekíde. Ampě âbíd mbōŋ tâŋgene ábê e'nyínen bé ekíde. ⁹ Eyale chōo ébédé e'nyínen bé ekíde é' mbále ábe é'nyínte' moonyon asyā̄l ekíde. Mó-'aá apagé'áá á nköŋsé-te. ¹⁰ Abédé á nköŋsé-te, boŋ kénéε Dyöb dēnhăgké nköŋsé ne mó, nköŋsé ménkēchemmé mó. ¹¹ Ampě áwē dyad boŋ ábē bad bēnkēnkobpé mó. ¹² Ké nê, ambě donge á bad kunze ábé bán bé Dyöb. Abé bad bēbédéε bad ábe bēnkob mó ne adúbe áde bēndūbēē mó. ¹³ Béesaá bán bé Dyöb nyaa echē moonyon áchyáá'ε mwān. Bēnkēmbáá bán bé Dyöb byánán moonyon mó achyáá bō. Dyöb dēn dōo áde awâb Titéε.

¹⁴ Eyale êntim moonyon, édyēē átínté echêd. Anlón ne nsimé, anlúmed-te syánē ngáne mbále e Dyöb ékóó abé. Dennyín échē ehúmé, ehúmé éche sáá ábágé mó néε nímē mpom mí mwān. ¹⁵ Jone anhób mam áyā̄l echê, anháád aá, “Anén mod móo

* **1:5** Ehíntén-ne éehēlēē bō abóded káa ehíntén énkēchemmé bō.

ńlángé'áá nyé meé, 'Mod ahúe' ámbid echêm awě atómé me, áyale bédêchyaá me, né adé ámin.' ”
 16 Alón áde álóné ne nsimé ábélé syáā moosyáál dekudé nnam ámbid e nnam. 17 Wéε Moseε dóo Dyöb dêmpoódté mbéndé. Bon nsimé ne mbále béhúú ne Yesu Krístəə. 18 Modmod eényĩnēε Dyöb mbêd, éetóméé nímē mpəm ní mwān awě adé Dyöb abé-'ε mó á akéb. Mwěmpen mó akidényĩn mó. Mó abelé bon Titê Dyöbe abyéen.

*Jone, Ndusenε ahóbé ad
 mósad Ane-awě-Béwógté*

(Mat 3.1-12; Mak 1.1-8; Luk 3.1-18)

19 Baámbáá bé Israel bé dyad á Jerusalem bénlōm beprise ne bad bémpēe bé túmbé e Levi wéε Jone, bán béke béseded mó bánken nzé-módé ádíí. 20 Enkēmbangé ahób, bon ampanléd bó áte aá, “Saké me ndé Ane-awě-Béwógté.” 21 Héε bésedtée mó bánken, “Nzé-ō edíí? Wε-εé edé Elaijaa?” Ankwentén aá, “Aáy, meésaá mó.” Bēnsedéd mó ámpē bánken, “Wε-εé edé nkal é'dəádəη awe bésinéé-yε?” Antimtén bó aá, “Aáy.” 22 Káəηne á asog dóo bésedtée mó bánken, “Nzé-ō edíí? Láá sé ábel sétim ámbid áláa bad ábe bélómé sé. Nzé-módé wewe ehóbé wεé módé?” 23 Héε Jone átimtanné bó ne e'yale ábe nkal é'dəádəη Yesayaa ánhōbpē aá, “Méε ndé ehób éche mod awě ahēηte' á ehyáηge aá, 'Nyétii nzii eche Sáηgwéé.' ”

24 Bəəb-pəó Befarisia bóo bénlōm ábē bad ábe bémpē wéε Jone. 25 Bēnsedéd mó ámpē bánken, “Nzé weésē Ane-awě-Béwógté, weésē-'ε Elaijaa káa Nkal é'dəádəη awe bésinéé, cheé-ō édušanné bad?”

26 Héε Jone átimtanné bó aá, “Ndusan ne mendib,

boŋ mod adé átíntê echên awě nyéēbīí'é. ²⁷ Mó adé ane awě āpě ámbīd echēm. Meékwognedéé áhune ké nímē nkōod mé metámbe.”

²⁸ Mmēn mésyāal mēmbenléd á dyad á Betani á múde mé edīb é Jodan nímíníí wéé Jone ádúsánnáá bad.

Yesue, Mwān-a-Ndyōŋ ní mbód a Dyōb

²⁹ Néé bīn é'sáŋgé, Jone anyín néé Yesue áhúé'é níníí. Héé áhóbéé aá, “Nyénone', Mwān-a-Ndyōŋ ní mbód a Dyōb mōne. Mó ahúde' mbéb ní bad bé nkōŋsé. ³⁰ Anén mod mōo nílángé'áá nyé áde ménhōbpē meé 'Mod āpě ámbīd echēm awě atómé me, áyāle bédēchyaá me, né adé ámīn.' ³¹ Ké mmēn menkēmbīí'é mó, boŋ mempě nídusan bad ne mendīb ábel bad bé Israel bēbīí mó.” ³² Héé Jone ábídéé mbōŋ nēn aá, “Menyín nēŋgáne Edāádəŋ é Dyōb ébídé ádyōb néé élāā, ésud mó á nló mīn, ébé- 'e ne mó. ³³ Ké nê, menkēnsōŋtēnné meé mō ne. Boŋ Dyōb áde dénlōm me aá nídusan bad ne mendīb dēmmād me aláa aá, 'Mod awě wényīnnē néé edāádəŋ é Dyōb ésúdé á nló mīn, boŋ étyéém áhed, mōsdusén bad ne Edāádəŋ éche Esáá.' ³⁴ Nnyíne nímēn mekan mésyāal, mbíde-'e mbōŋ nēn meé mó adé Mwān a Dyōb.”

Bembapēé bé'sō ábe Yesue

³⁵ Néé bīn é'sáŋgé ámpē, Jone ambé áhed ne ábē bembapēé bébe. ³⁶ Annyín néé Yesue átóméé. Adě ányíne mó, anhób aá, “Nyénone', Mwān-a-Ndyōŋ ní mbód a Dyōb mō ne.” ³⁷ Adě ábē bembapēé bébe bēwógé nê, bēmbootéd Yesue ahíd. ³⁸ Ade Yesue ánóné ámbīd boŋ anyín nēŋgáne bēhídéé mó ansedéd bó aáken, “Cheé nyéhedéé?” Bēntimtén

mó bán, “Rabai” (awě adé bán meléede) “Héé édyε’έ?” ³⁹ Anláá bó aá, “Nyéhyag, nyényín wée ndyεε’έ.” Né-ᶇᶇ, bēnkě anyín wée ádyεε’έ. Ade bépédé áhed ébédé dyam ngóη éniin é ngukél. Bēndyεε-’ε áhed kááη bīn é’híntén bó. ⁴⁰ Atíntê e ábê bembapεε béβε ábe bēnwōg dyam áde Jone ánhōbpē boη bēhíd-te Yesuε, nhóg abédé dīn bán Andreyá. Andreyá abédéε Simōn Petro mwānyan. ⁴¹ Né-ᶇᶇ dyam dé’sō, ankě mwānyan Simōne áhed. Anyíné-’aá mó boη álāngē mó aá, “Sēnyíné Ane-awě-Béwógté” (nédē Krīstəə). ⁴² Dóo Andreyá ápééné Simōne wée Yesuε. Yesuε anōné-’aá Simōne chóóη, boη áhōbē aá, “Edii Simōne, mwān awě Jone. Béchəgé wε bᶇᶇb bán Sepase.” (Adén dīn ádii melemlem nēε Petro, nê adé ndim e aláá.)

Yesuε achénlé Filibe bó Nataniél

⁴³ Nēε bīn é’sángé, Yesuε ammad aá mókag á mbwóg e Galilia. Dóo ákíí Filibe atán boη álāngē mó aá, “Hídé me.” ⁴⁴ Filibe abédéε mod a dyad á Betsaida, melemlem mé dyad ádē Andreyá bó Petro bémbidtē. ⁴⁵ Filibe anyín Nataniéle. Héε álāngéé mó nén aá, “Sēnyíné ane mod awě Moseε ántenlé mam áyāl echē áwe mbéndé-te. Móo kááηne bekal-bé-e’dəádəη bēntenlé mam á yāl. Adii Yesuε mod a dyad á Nazaret, mwān awě Josebe.” ⁴⁶ Héε Nataniéle ásedtéé mó aáken, “Dyam á bwām áhéé áhεle ábid á Nazaret?” Dóo Filibe álāngéé mó aá, “Hyě ényín.” ⁴⁷ Ade Yesuε ányíné Nataniéle ahúε’, dóo áhóbéé áyāl echē aá, “Nyénone, mwān a Israel nén sóm-sóm, awě mbeltéd nítyémé!” ⁴⁸ Héε Nataniéle ásedtéé mó aáken, “Chán émwédé me abii?” Héε Yesuε ákwεntanné aá, “Filibe adēhób aá móchəge wε, nnyíné wε á alín á ngəl sé.” ⁴⁹ Héε

Nataniελε áhóbεé aá, “A meléed, edii Mwän a Dyöb. We-εé edé kâη e bad bé Israel.” ⁵⁰ Yesue antimtén mó aá, “Edúbpé áyāle rílangé we meé nnyíné we á alín á ngəl sé. Weényīn mam mímě métómé nén.” ⁵¹ Héε ábádeé aá, “Ne mbále, nlānge nyé nén meé, nyéēnyīn née dyöb ánédnéde nyēnyīn-ne née ángel é Dyöb échágkεé ésudé-’ε Mwän-a-Moonyonj ámin.”

2

E’wóngé á dyad á Kana

¹ Ambíd e e’pun é’be, e’wóngé bémbē á dyad á Kana á mbwóg e Galilia. Yesue nyaá ambé áhed. ² Bénlēbē Yesue ne ábē bembapεε bómpē á e’wóngé wê. ³ Mīm mēmmaá áte. Hê dóo Yesue nyaá ápédé áwē boη álāngē mó aá, “Mīm mémáá bó.” ⁴ Héε Yesue álāngεé mó aá, “A-nyan, weetāηgenεé me dyam áde rítāngéné abel aláa. Echem pónde eépédéé.” ⁵ Héε nyaá ákíi bembaledε bé ngande bē aláa aá, “Nyébel kéchéé éche álāngé nyé aá nyébel.” ⁶ Bōōb-pōō, mbeé é meláá ébedé benben ne áhed. Echê ndín é mbeé chōō bad bé Israel bébēnládtáá áhé mendíb áte á nwobe ní yāl á pónde e mekáne echâb. Ké ehéé etedé’áá dyam mbwókel e líta e mendíb. ⁷ Héε Yesue álāngεé bembaledε bé ngande bē aá, “Nyélóned mbeé chē ne mendíb.” Né-ōō, bénlōnēd échē mbeé hōōd ne mendíb. ⁸ Dōo álāngεé bó aá, “Nyékōbe-ōō mendíb bōōb, nyékεεn wéε mod awē alyágte’ mekan mé ncháged.” Né-ōō, bēmbēl áned. ⁹ Ade ane mod áwógléné mímē mendíb míme mémáá mīm atim, enkēmbíí’é wéε mébíde, (boη bembaledε ábe bēnkē mímē mendíb akōbe bémbíi). Dōo áchágé mod awē akude sómbé,

¹⁰ boŋ álāngē mós aá, “Mod téé abelé asébe achágtén bad mím nímé mébóó. Bad bémaa-’áa mós amwé bwāmbwam, boŋ ábagé bós nímé mééboo. Boŋ we, etimé ekōŋgé míme mébóó kááŋ ne bōōb.” ¹¹ Mmén menyáké nímé Yesue ábélé á Kana á mbwóg e Galilia mós mébédé ábē e’chemléd é’sō. Hē dós-’aá álúmté échē ehúmé, ábē bembapεε bēnsūm-me nímab nlém áwē.

¹² Néε nēn áamá atóm, Yesue ansyógé á dyad á Kapenahum nchoo ne nyaá, baányan ne ábē bembapεε. Bēndyεé-’ε áwed nguse é e’pun.

*Yesue anané bekáb bé nyonǵé á Ndáb-e-Dyōb
(Mat 21.12-13; Mak 11.15-17; Luk 19.45-46)*

¹³ Adē pónǵé e Ngande e Nnyíme-ámín ékwógé bad bé Israel apε, Yesue ankě á dyad á Jerusalem. ¹⁴ Adē ápédé áwed, ankě á Ndáb-e-Dyōb. Antán néε bad békábεé dyōn. Bésómé-’-áá nyag, mbód ne mbəŋgé, bepele-bé-mōné-’ε bépēnlé mōné. ¹⁵ Héε átédé nkōōd, ámané etaŋgú ánanné bós nchoo ne échab mbód ne nyag á Ndáb-e-Dyōb wē. Ampántéd mōné nímé bad bépēnlé’áá áte, ákūnē-’ε betébele ábe bépēnlé’áá nímé mōné ámín mekuu ámín. ¹⁶ Anláá bad ábe bésómé’áá mbəŋgé aá, “Nyébíden beləə bēn á ebwóg. Nyéētímté ndáb echě echem Sāŋ ndáb e dyōn.” ¹⁷ Adē ábē bembapεε bényíné nē, dós békámténé eped é kálag e Dyōb éche éhóbe nēn bán “A-Sāŋ, kán echě níwóó áyāle echoŋ ndáb ēwū me.”

¹⁸ Héε benkamlenε bé bad bé Israel bétímé ámbíd, bésēdté mós bánken, “E’chemléd é’héé ehle elúmed sé ábel sébíi bán ewóó kunze ábel enén ndín e dyam?” ¹⁹ Yesue antímtén bós aá, “Nyépāŋ enén Ndáb-e-Dyōb, mēlōŋ chó ámpē áyāle e’pun

é'láán.” ²⁰ Dóo ábê bad béhóbeé bánken, “Enén ndáb echě bétédé móom mé mwě méniin ne mwě ntóób chóo éhóbeé wéé móōlōn áyāle e'pun é'láán-ε?” ²¹ Bon ndáb echě Yesue áhóbe'áá ebédéé dásō eche yāl. ²² Né-óó ámbīd eche Yesue áwédé bon Dyōb ápūūd mó, dóo ábē bembapεε békámténé dyam ádē ánlāā'é bó. Béndübē mam nímě méténlédé á kálag e Dyōb, bédúbé-'ε e'yale ábe Yesue ánhōbpē.

Yesue abii mod asyáál nlém áte

²³ A pónde e Ngande e Nnyíme-ámīn, áde Yesue ámbēē á dyad á Jerusalem, bad híin béndübē mó ngáne bényinnē menyáké nímě ábeleé. ²⁴ Bon ké nē, Yesue enkēsummé nlém áwāb, áyāle ambíi moosyáál áte. ²⁵ Modmod enkētāngénné mó dyam aláa tāngene mod ampée áyāle mwēn ammad moonoyon asyáál nlém abii áte.

3

Yesue bó Nikodemuse

¹ Mod nhóg abédé bán Nikodemuse. Abédéé nhóg awě alyágté'áá bad bé Israel abé-'ε epepé é bad bé Farisia. ² Mbwe nhóg ampě wéε Yesue nkuu, álāngē mó aá, “A-meléed, sêchemé nén bán, edii meléede awě Dyōb álómé. Áyāle nzé Dyōb déesě ne mod, eéhēlēē-se ábelé mekan mé menyáké nímě ébeleé.” ³ Yesue ankwentén mó aá, “Ne mbále, modmod eéhēlēē-se asól á nkamlēn ní Dyōb ésebán achyáádté ámpē.” ⁴ Nikodemuse-'ε ansédéd mó aáken, “Chán mod awě amaá akwog áhele se achyáád ekóólé-ekóólé? Eesaá mbále nén bán eéhēlēē-se asól á abum ádē nyaá ngen échě

élónténé ébe âbel béchyáa mó ámpē-ye?” ⁵ Dóo Yesue átimtanné mó aá, “Ne mbále, nlânge we meé, nzé béēchyáa mod ne mendíb ne Edáádəŋ éēhēlēē-se asól á nkamlən rí Dyöb. ⁶ Ane awě achyáádté ne moonyoŋ a ekob, adíí moonyoŋ. Awě mó-’ε achyáádté ne Edáádəŋ é Dyöb adíí Edáádəŋ. ⁷ Weebág menyáké ngáne ríhóbé meé ‘Mod atəngéné achyáád ekóólé.’ ⁸ Nzé epub éhóbé bán chó étóme’, pəd echě édíá ake chóó ékagké. Ewóge’ ntəgag míme ébeléé boŋ weebíé’ε wée ébídeé ké’ε wée ékagké. Melemlem nê dóo édíí ne mod ké ahée awě achyáádté ne Edáádəŋ é Dyöb.” ⁹ Héε Nikodemuse áseɗteé mó aáken, “Chán nén áhεleεe ábenled?” ¹⁰ Yesue ankwentén mó aá, “Née édíí meléede ambáá a bad bé Israel weéhēlé’ nímén mekan asóŋten-ne? ¹¹ Ne mbále, nlânge we meé, dyam áde sébíí dóo séhóbéé. Sébíde-ε mbóŋ ne dyam áde sényíné. Boŋ nyé modmod nyéēkwenteneé chöm éche séhóbéé adúbe. ¹² Née rílanḡéé nyé mekan míme médé mekan mé nkōŋsé, nyéedúbpe, chán-nō nyémwée adúbe nzé nlánḡé nyé mekan nímě médé mekan me nkoŋ ní mín? ¹³ Modmod eékí’ε á nkoŋ ní mín étōmεé Mwān-a-Moonyoŋ awě abídeé áwed boŋ ápe á nkōŋsé.” ¹⁴ Ngáne Mosεε âmboméé nyă á akon* boŋ atíí dó ámín á ehyánḡe, melemlem nê dóo bétí’ε Mwān-a-Moonyoŋ. ¹⁵ Nén débenléd âbel boŋ kénzée awě adúbpé mó ákud alongé áde déemaá’.

¹⁶ Dyöb átómténé bad bé nkōŋsé adəŋ. Né-ó anlóm nímē mpəm ní Mwān âbel kénzée awě

* **3:14** Nyă eche Mosεε âmboméé ebédée nyă eché âmbenlé. Nê dóo Dyöb démbenlé áhood bad ábe nyă énlēdté á ehyánḡe. Nzé bad bēnnān ene nyă, bédyēē bwām. Nəm 21.9.

adúbpé mós eewág bon ákud alongé áde déemaá'.
 17 Dyöb dénkênlómme awe Mwän á nköhsé ákáad bad. Alongé á bad dós ánlómme mós áson. 18 Kénzéé awě adúbpé mós eékwaá nkáásé, bon kénzéé awě eedúbpe mós, amaá nkáásé akwe áyāle eedúbpeé mpom ní Mwän ní Dyöb. 19 Nén dós mbakú e Dyöb édíí: E'nyínen bé ekíde é'pédé á nköhsé, bon baányon bédáá ehíntén tómaa e'nyínen bé ekíde áyāle nímbā mbeltéd níde mbéb. 20 Kénzéé awě abele mbéb, akós ábē e'nyínen bé ekíde, éepaá-'aá á e'nyínen bé ekíde-tē ábān nēn nímbē mbeltéd mé mbéb méēbídē áwed. 21 Bon kénzéé awě abele mam mé mbāle, abíde' á e'nyínen bé ekíde ábel nēn bad bényín bán kéchéé échē ábeléé awógne Dyöb.

Mbón echē Jone tñgene Yesue

22 Ambíd e nē, Yesue ne ábē bembapēe bēnkē á mbwóg e Judeya. Bóbō bēndyēé áwed nguse é e'pun, ádusán-ne bad. 23 Jone mómpē adusánáá bad á dyad á Anon benben ne á dyad á Salim áyāle mendíb mémbē áhed bwāmbwam. Bad békágé'áá áwē, ádusán-ne bó. 24 Nén ábédé byánán béhē Jone á mbwóg. 25 Bōob-pós, donje dé bembapēe ábe Jone bépéntánnáá ne mod a Israel tñgene nwobe ní yāl. 26 Dós bépédé wēe Jone bon bēlāngē mós bán, "A-meléed, ekamtan mod awě nyúmō nyēbédé á pēd e edíb é Jodan eníníí? Mod awě éhóbé'áá mam á yāl echē. Nóné! Mós adusan bad níníí! Bad híin békagke áwē." 27 Jone ankwentén aá, "Modmod eéhēlēē-se ákud chöm, ésebán Dyöb ábágé mós chós. 28 Nyébēn nyédé me mbón nēn bán menhób méé saké me ndé Ane-awě-Béwógté.

Dyöb dénlōm με á'sō âbonŋsen bad áyāle επε éche Ane-awě-Béwógté. ²⁹ Mod awě akude sómbé mōo awóó sómbé. Boŋ nsón-a-echoŋ a mod awě akude sómbé, awě atyéeme mō á nkəg áwōglān mō, abāg menyiŋge nzé awóge mō ehób. Né-óó, nén dōo ákəá boŋ nlón ne menyiŋge. ³⁰ Edúbé échē étāŋgéné née échágkεé, échēm-me ésude'."

Ane awě abidé ádyōb atómé moosyáál

³¹ Ane awě abidé ádyōb atómé moosyáál. Ane awě mō'-ε achyáádté á nkōŋsé adii mod a nkōŋsé, áhōbē-ε mam mé nkōŋsé, boŋ ane awě abidé ádyōb adé ámīn e moosyáál. ³² Chōm éche ányíné ne éche áwógé chōo áhōbεé boŋ ké nê, modmod eedúbpéé mō. ³³ Boŋ kénzée awě akobé chōm échē áhōbé, né akwεnténé ne nlém rīsyāāl aá Dyōb ádé mbále. ³⁴ Póle e Dyōb chōo mod awě Dyōb álómé áhōbεé áyāle Dyōb déenənée ámbid nzé abage' mod échē Edəádəŋ. ³⁵ Titée adəá awe Mwān, abagé-ε mekan mésyāāl áwē mekáá. ³⁶ Kénzée awě asumé nlém wée ane Mwān, akudé alongé ádē déemaá'. Boŋ kénzée awě eébéł' ngáne áhōbé éekudté alongé áde déemaá', ábē akud nkógsen rī Dyōb.

4

Yesue ne mmwáád a Samaria

¹ Yesue ambíí aá Befarisia béwógé nén bán mókude ekud é bembapεε tómaa ne Jone, módusan-ne bó. ² (Kénée Yesue mwēn éedusannaá bad, ábē bembapεε bóo bédúsánnáá bad). ³ Awóg áde Befarisia bēnwōgkē nê dēmbēł Yesue anhidé á mbwóg e Judeya átim ámbid á mbwóg e Galilia.

⁴ Byánán ἄρε á Galilia antónghén née ápóó a mbwóg e Samaria. ⁵ A mbwóg e Samaria wê ampě á dyad áde béchəgέέ bán Sika. Adén dyad démbē βενβεν ne ndəəb echě Jakəbe ámbεέ mwān Joseβε se e'boəd. ⁶ Ayāle ene ndəəb echóg éche bélimé éche bébwélé'áá mendíb áte émbē áhed. Echén echóg é mendíb ébéδέε éche Jakəbe. Ngáne eke énkōmēdtē Yesue andyεέ á nkəg mé échē echóg é mendíb. Nén ábéde dyam-εε áde kəd.

⁷ Héε mmwaád a Samaria nhóg áhyédé mendíb abwel. Yesue anláá mó aá, “Hé me mwā mendíb mé amwé.” ⁸ Enén pónde Yesue ábē bem-bapeε bēnkě á dyad-tē áchan ndyéed. ⁹ Héε ane mmwaád átimtanné mó aá “Ebé mod a Israel, me'ε mbé mmwaád a Samaria, échōmē me mendíb-ε?” (áyāle bad bé Israel ne bad bé Samaria béechemtannaá.) ¹⁰ Héε Yesue ákwentanné mó aá, “Nzé wembíí mende mé Dyōb, ebíí-ε mod awě ahedne we mendíb, né ehědné me mendíb. Né mbagé-ε we mendíb míme mébage alongé.” ¹¹ Ane mmwaád ankwentén mó aá, “A-Sán, ké chōm éche bébwεnléé mendíb weewóó'ε, echóg é mendíb-pe échábé áse, héε wétēdtē míme mendíb míme mébage alongé. ¹² Echəd sáá ambáá Jakəbe mōnlyágnéd sé échén echóg é mendíb. Mwēn, ábē bán ne ábē e'lém é'syāāl, hén-εε bémwágé'áá mendíb. Nédē ehóbe boəb wεé mótomē Jakəβε-ye.” ¹³ Yesue ankwentén aá, “Kéznéé awě amwéde mímén mendíb, píd ēbē ekób mó. ¹⁴ Bon kéznéé awě āmwē mendíb míme mébéé mó píd éekóbpé mó mbéd. Mendíb míme mébéé mó, mébē mó áte née n'yélé míme méēlēnē'. Mmē mendíb mébě mó alongé áde déemaá'.” ¹⁵ Héε ane mmwaád álāngεέ

mó aá, “A-Sán, beé me nímê mendíb âbel nén píd eekóbé mémpē, meépāg-ke hén âbwel mendíb âmpē.”

¹⁶ Dóo Yesue álângeé mó aá, “Kăg, éke échag awon nchóm, bon étim ámbíd hén.” ¹⁷ Ane mmwaád antimtén Yesue aá, “Mewóó’é nchóm.” ¹⁸ Dóo Yesue áhóbéé aá, “Ekalé mbále wéé móowóó’é nchóm. Ayāle ekéwōn bechóm bétāan, ké ane mod-te awē nyúmō nyêdé bōob eésaá awon nchóm. Dyam áde éhóbé áde mbále.” ¹⁹ Awóg áde ane mmwaád áwógé nê dóo álângeé Yesue aá, “A-Sán, nnyíne nén meé edii nkal é’dáédān. ²⁰ A mbōod-mín hén dóo ábēd besáá bébágé’áá Dyōb edúbé, bon nyé bad bé Israel nyéhóbe bán á Jerusalem dóo bétāngéné Dyōb edúbé abe.” ²¹ Héε Yesue álângeé mó aá, “Á-mmwaád nén, sōntén chōm éche nlangeé we. Póndé ehúe’ echē nyéebaá Titée edúbé á mbōod-mín hén ké’ε á Jerusalem. ²² Nyé bad bé Samaria nyébage chōm éche nyéebíi’é edúbé. Bon sé bad bé Israel sēbage mó edúbé ngáne sébii mó áyāle nén e’soosōn é’húú dāsō ne bad bé Israel. ²³ Bon póndé ehúe’, emaa’-ε ne ape, echē bad ábe bébage Titée edúbé ne nlém nhóg bébéé mó échē edúbé á Edáédān ne á mbále-tē. Echē ndín é bad chōo Titée áhedeé aá bébage mó edúbé. ²⁴ Dyōb ádii Edáédān, bad-te ábe bébage mó edúbé bétāngéné mó chó abe á Edáédān ne á mbále-tē.” ²⁵ Héε ane mmwaád álângeé Yesue aá, “Mbii meé Ane-awē-Béwógté āpě. Póndé echē ápeé, ātānlēd sé mekan mésyāāl áte.” ²⁶ Héε Yesue álângeé mó aá, “Me awē sóo dekale’ me-éé ndé mó.”

²⁷ Ene póndé chēn dóo ábē bembapεε bépédé. Yāl enkóm bó áte ányín née ákanléé mmwaád.

Boη bó modmod eésedteé mó aáken, “Cheé éhedéé?” Ké-’ε “Cheé nyé ane mmwaád nyékaleé?”
 28 Ane mmwaád antedé apom dé mendíb, átim ámbíd á dyad-tê, áke aláá bad aá, 29 “Nyéhyag, nyényín mod awě alángé me mam mésyā́l míme ríkémβenlé. Nyé bán, saké Ane-awě-Béwógté awě bésinéé nén-ε?” 30 Dóó ábê bad béhídté á dyad-tê áke dé atán Yesue.

31 Ene pónde, bembapεε ábe Yesue bécháá’áá mó bán, “A-meléed dyé ndyééd.” 32 Boη Yesue ankwentén bó aá, “Nwóó ndyééd e adyé echě nyéēbii’é.” 33 Héε ábē bembapεε bésedteé nhóg ne aníní bánken, “mod múmó apiínédé mó ndyééd-ε?” 34 Dóó Yesue alángeé bó aá, “Echem ndyééd edii ábel nsón míme mod awě alómé me, áhóbé aá míbel, ámad-ε mó. 35 Ngómē nyéyǒgké ahób bán ámbíd e ngǒn éniin, né pónde e mbote epedé? Nyénone’, nlánge nyé nén méε nyékéled díd áte, nyényín ngáne mbote é máá mbonśén abé, ápád á nzag-tê. 36 Ké bǒǒb mod awě apáde adé míme nsábe akud, alade mbote é alóngé áde déemaá’, ábel nén mod awě awéne bó mod awě apáde bó moosyā́l bébê menyinge. 37 Né-ǒǒ ngan echě békaleé nén bán, ‘mod nhóg awénéé, aníní-’ε ahúd edé mbále.’ 38 Mε-εé nlómé nyé mbote áke dé apád éche nyéēwénéé. Bad bémpēe bébélé nsón, nyé-’ε nyétombwan bó nsón.”

Bad bé Samaria hiin bédúbpe

39 Bad bé Samaria hiin ábe bémbíd ádé dyad béndübē Yesue áyā́le mam míme ane mmwaád ánlā́’é bó. Ane mmwaád anláá bó aá, “Alángé me mekan mésyā́l míme ríkémβenlé.” 40 Né-ǒǒ,

áde bad bé Samaria bépédé áwē, bēnchāḡ mó bán ádyεε áwāb dyad. Né-ᶇó, andyεé áwed e'pun é'βε. ⁴¹ Bad híin bémpēe bēndūbē mó áyāle áde ayáge. ⁴² Bēnlāā ane mmwaád bán, “Saké dyam áde élāḡgē sé dēmpen dᶇó akáá boḡ sēdúbé Yesuε, boḡ sébēn sēwógné etúu, sēbíí-'ε bán mwēn-εé akōḡté Nsoode a nkōḡsé abé.”

*Yesuε achōḡté mwān
a mod ambáá a ḡómenaa*

⁴³ Ambíd e e'pun é'βε Yesuε anhidé á mbwóg e Samaria, áke á mbwᶇg e Galilia. ⁴⁴ Yesuε mwēn anhób aá, nkal é'dáádəḡ eewóó'é edúbé áwē dyad. ⁴⁵ Ade ápédé á mbwóg e Galilia, bad bēnkob mó. Bēnkob mó áyāle bēmbē á Ngande e Nnyíme ámīn á Jerusalem, bényín-ne mam mésyāēl míme ámbenlé.

⁴⁶ Héε Yesuε átímé ámbíd á Kana, wéε ântimédte mendíb mīm. Ahed-te dᶇó mod ambáá a ḡómenaa ábédé awē mwān akónlé'áá á dyad á Kapenahum. ⁴⁷ Ade ane mod áwógé bán Yesuε ábídé á mbwóg e Judeya apedé á mbwóg e Galilia, ampě áwē, achāḡ mó aá áchood mwān, awē ambé benben ne kwééd. ⁴⁸ Yesuε anláá mó aá, “Nyé modmod nyéedúbpéé káəḡ né nyēnyíne e'chemléd ne menyáké.” ⁴⁹ Ane mod ambáá a ḡómenaa anláá mó aá, “A-Sāḡ, hyāḡ, dékag kwééd edé ehób bán chó ekóbe awem mwān.” ⁵⁰ Yesuε antimtén mó aá, “Kāḡ, awoḡ mwān ābē á alongé.” Ane mod andúbé e'yale ábe Yesuε, ákē-'ε. ⁵¹ Ade ane mod ádíí adé á nzii e esú dᶇó ábē bembəlede bēbómne mó, boḡ bēlāḡgē mó bán, “awoḡ mwān ābē á alongé.” ⁵² Dᶇó ásédte bó pónde echē ane mwān âmbootédte bwām abé.

Bénlāā mó bán, “Ahéb dētēdé mó chän á ngəŋ póg.” ⁵³ Dóo ane mod ákámtnéné aá nímē melemem mé póndé móo Yesue ánlāā’é mó aá, “Awoŋ mwän äbē á alongé.” Né-óó, bóobe eche ndáb béndübē Yesue.

⁵⁴ Abén e’chemléd bóo bémbē e’chemléd ábe é’lonténé é’be ábe Yesue ámbenlé áde ábíde á mbwóg e Judeya boŋ ápē á mbwóg e Galilia.

5

Yesue achōŋté eped é mod

¹ Ambíd e nímén mésyāāl, Yesue ankě á Jerusalem á ngande e bad bé Israel. ² A Jerusalem wê, benben ne Nsəl mé E’ké mé Ndyoŋ ní mbód, etoŋ ébédé áhed. Echén etoŋ béchágé’áá chó á ehób é bad bé Israel bán Betzata. Enwōŋ mebépé métáan. ³ A mebépé-te wê, bad bé nkole bénkūmēn áhed, ábe békwédé ndím, ábe bédé e’ped é’ bad ne ábe béwédé eped.* ⁵ Mod nhóg abédé áhed awě akékolé á etūn é móom mé mwě méláán ne mwě waam. ⁶ Ade Yesue ápédé áhed annyín ngáne ane mod ánángé ásē, abíí-ε aá nkole nímémé mó á yəl. Dóo ásédte mó aáken, “Edəó bwām adyεε-yε?” ⁷ Ane mod antimtén mó aá, “A-sán, meewóó’é mod awe äsölēd me á etoŋ-tê nzé mendíb mépuútédé áte. Nlédte ahób meðé nsól, né mod ampée amaá asól.” ⁸ Dóo Yesue álāŋgée mó

* **5:3** Doŋge á kálag ábádé nchoo 3b-4: Abé bad bé nkole bémbē áhed ásin bán mendíb mépuuted áte. 4 Ebédé nén bán, pónde-té ángel eche Sāngwéeé ehyagáá asud á etoŋ-tê wê épuuted chó áte. Nzé émbenléd-te né, mod a nkole ké ahée awě ansébé asól áwēd-te nkole nímáá’áá mó.

aá, “Syəá ásē, étêd échon ebúm, ékag.” ⁹ Abwōg-ábwōg ane mod andyě bwâm, ányāg échē ebúm áte, ábootéd-te akε.

Epun éche nén dēmbēnlédte ébédéε á mbwε-mé-nkóme-áte. ¹⁰ Né-ɔ́, anyín áde bad bémháá bé Israel bényíné ane mod awě Yesuε ándidte bwâm, bēnsédéd mó bánken, “Chii áde mbwε-mé-nkóme-áte, nzé dehídé-’ε mbéndé echêd, weetāngeneé ebúm apém se ébwāgne’.” ¹¹ Boŋ ankwentén aá, “Mod awě adidé me bwâm anláá me aá, ‘Téd échon ebúm, ékag?’ ” ¹² Héε bésedtεé mó bán, “Nzé adé ane mod awě álāngé wε aá, étêd échon ebúm ékag?” ¹³ Boŋ ane mod mwěn enkēnkongé Yesuε abíi, ngáne Yesuε ámmadté asól á amute-tê áde dēmbē áhed. ¹⁴ Ambíd enê Yesuε annyín ane mod á Ndáb-e-Dyöb. Ade ányíné mó, anláá mó aá, “Nɔ́né’, emáá bwâm adyεε. Weébēlē mbéb ámpē ésebé nê, né wětōm atag ngáne étágé’áá nê.” ¹⁵ Hê dɔ́ ane mod áhídté, boŋ áke álāngē bad bémháá bé Israel aá Yesuε móɔ adidé mó bwâm. ¹⁶ Né-ɔ́, bad bémháá bé Israel bēmbootéd Yesuε mekuu ahíd áyāle achōŋté mod á mbwε-mé-nkóme-áte. ¹⁷ Yesuε antimtén bó aá, “Echem Sáŋ ayōgké nsón abel, me-’ε ámpē ntāngéné nsón abel.” ¹⁸ Enén póle echē Yesuε ánhōbpē, emběl yāl ennabé bad bé Israel atod áte áwúu mó, áyāle saké mbéndé e mbwε-mé-nkóme-áte, chēmpen ábóó boŋ achagé Dyöb aá Sáá, nédē alúmté’ aá bó Dyöb bétáá.

Ngine e Mwän a Dyöb ehúú ne Dyöb

¹⁹ Né-ɔ́, Yesuε antimtén ábê bad bémháá bé Israel aá, “Á mbále, nlānge nyé nén meé, Mwän a Dyöb eébēlēε dyam ké ahóg ne mó mwěn.

Mekan níme anyíneé Sáá abele' mósó mómpe ábeleé. Kéchéé éche Sáá ábeleé chósó mómpe ábeleé. ²⁰ Ngáne édíí nén bán Sáá adáo Mwän, alümte mósó chóm téé éche ábeleé. Alüméd-te mósó ndale é mekan éche étómé nímén, ábel ékómed nyé yál áte. ²¹ Ngáne Sáá ápuudteé bad bon ábage-'ε bó alongé, melemlem nê dósó Mwän mómpe ábageé alongé wée kenzéé awě adáo alongé abε. ²² Melemlem-'áá Sáá éékāadtē modmod. Abagé Mwän ngine esyā́l ákáad bad. ²³ Abelé nê ábel bon bébage Mwän edúbé melemlem ngáne bébageé Sáá. Kenzéé awě eébage Mwän edúbé, né eébageé ké Sáá awě alómé Mwän edúbé. ²⁴ Ne mbále, nlänge nyé nén mée, kenzéé awě awógé ábêm e'yale bon adúbé mod awě alómé mε, akudé alongé áde déemaá', béekáad-taá mósó. Amaá atóm á kwééd, asólé á alongé. ²⁵ Ne mbále, nlänge nyé mée, pónde ehúé', emaa-'ε apε, echě bad ábe béwédé béwōgkē ehób e Mwän a Dyōb, bad ábe béwōg-kε chósó bébē á alongé. ²⁶ Ngáne alongé áhúú ne Sáá, melemlem nê dósó ábélé áá alongé áhúú ne Mwän ámpē. ²⁷ Abagé-'ε Mwän ngine ákáad bad áyā́le Mwän adíi ane awě béchəgεé bán Mwän-a-Moonyon. ²⁸ Nén déékōmtē nyé yál áte; pónde ehúé' echě bad bésyā́l ábe béwédé béwōgkē échē ehób, ²⁹ bébíd-te á son-tē: Bad ábe bébélé mbon, bépuú ábē á alongé, ábe bó-'ε bébélé mbéb bépuú békud nkógsen.

Mbón áyāl wée Yesue

³⁰ “Dyamdyam déesaá áde níhεle níbēl ne mmén. Ngáne echem Sáj álángé mε áá níkáad nê dósó níkáadtéé, né-ósó mbakú echēm etyéémé. Etyéémé

áyāle meekáádtéé ngáne mmēn rídáá, boŋ nkáadte' ngáne mod awě alómé me áhedéé.

31 “Nzé mbíde echem yǎl mbóŋ né ene mbóŋ echě mbídeé eékobnedéé. 32 Boŋ mod ampée adé awě abíde me mbóŋ, mbíí-'ε nén meé, mbóŋ echě ábídeé me eköbnédé. 33 Nyênlóm bad wée Jone, mó-aá abíde mbóŋ t̄ŋgene mbále. 34 Eesaá nén bán, moonyoŋ at̄ŋgéné me mbóŋ abíd. Boŋ nlángé nyé t̄ŋgene mbóŋ eche Jone, ábel nyédúbe me, nyékud e'sósoŋ. 35 Jone abédéé née etrukán éche échodne', épenté-'ε ekíde. Nyêmbé menyin̄ge áhíd ábê e'nyínen bé ekíde áyāle esóŋ é pónde. 36 Boŋ nwóó mbóŋ echě etómé ké mbóŋ echě Jone ámbídtē. Nsón níme echem Sáj abágé me aá mbel nímad, mmēn mbíde mbóŋ nén bán echem Sáj móó alómé me. 37 Echem Sáj awě alómé me mwēn ámpē abíde me mbóŋ. Nyéewógéé mó ehób, nyéenyíné-'aá mó mbéd. 38 Nyéedúbpeé ane awě alómé, né-ɔ́ nyéemwagké bán échē eyale édyεε nyé á nlém-tē. 39 Nyêkíde' Eyale é Dyöb ahed áte áyāle nyêwēmtan bán nyééküd alongé áde déemaá' áwēd-te. Echén Eyale chēn-εε ehóbe áyāl echēm. 40 Ké nê, nyéehédēε ape áwēm ábel boŋ nyékud alongé áde déemaá'.

41 “Saké edúbé é baányoŋ níhedéé. 42 Boŋ mbíí nyaa é bad éche nyédíí, mbíí-'ε meé nyéewōh̄néé Dyöb edaŋge á nlém-tē. 43 Mpedé á d̄ŋn áde echem Sáj, nyéékobéé me, boŋ nzé mod ampée apedé á d̄ŋn ádē d̄ēn, nyéékob mó. 44 Nzé nyékene' nhóg ne aníníí, nyéwōgē bwám, boŋ nyéēbēlēε ngáne Dyöb d̄ēn dékenné nyé. Chán-nō nyédúbēε me? 45 Ké née nyéekobéé me, nyéewém̄tán bán, me-éé m̄lāā

echem Sáŋ meé nyéēkobee me. Mosē awē nyélyágé nlem áwē mwēn-neé akōŋté ane abé awē áhōb aá, nyébelé mbéb. ⁴⁶ Nzé nyēnkōŋ Mosē adúbe né nyédúbpé me, áyāle nēn, áyāl echēm dōo ántenlé mam míme átélé. ⁴⁷ Boŋ nēe nyédúbpéé mekan míme átélé, chán nyédūbēē ábēm e'yale?"

6

Yesue adíté ndun e mod

(Mat 14.13-21; Mak 6.30-44; Luk 9.10-17)

¹ Ambíd e nímén mésyāāl, Yesue ne ábē be-
mbapēe bēnchabé edib é Galilia éche béchagēé
bán edib é Tiberia. ² Ndun e mod ehídé'áá mó
áyāle bényíné'áá menyáké míme ábélé'áá ngáne
áchóŋté'áá bad bé nkole. ³ Hēe Yesue ne ábē be-
mbapēe békíí á ekone-mín boŋ bédyēē ásē. ⁴ Póndé
e Ngande e Nnyíme-ámín e bad bé Israel embé
benben. ⁵ Asad áde Yesue ásádé dīd annyín ngáne
ndun e mod éhúé'é mó benben. Dōo ásedtéé Filibe
aáken, "Hēe déchanné ndyééd echē débēé ábén bad
ádyé?" ⁶ Ansedéd mó nê ákæg mó áyāle mwēn
ammad abii chōm éche ábenlé. ⁷ Filibe ankwentén
aá, "Etéd tómaa ne mbwókel é kábpe ébe áchan
ndyééd éche ékwognéd ábén bad bésyāāl adyé ábel
boŋ mod téé ádyê mwätííd." ⁸ Dōo Yesue awē
mbapēe ampée, Andreyá, Simōn Petro mwānyā
áhóbēé aá, ⁹ "Mwā kódemod adé hén awē awánlé
e'wēle é'taan ábe bēbénlé ngun é báli, awánlé-
e súu ébe, boŋ chán enén ndyééd éhéleé-se ékwōg
enén ndun e mod?" ¹⁰ Dōo Yesue álānggēé ábe be-
mbapēe aá, "Nyéláa ábē bad, bédyēē ásē." Nkəákəə
ambud abé á pēd e ádê abwóg a hōm. Né-óó, ábē
bad bésyāāl bēndyēé ásē. A amute-tê wē, baachóm

bébédé dyam e'kálé é'taan. ¹¹ Héé Yesue átédé ábē e'wale, ásāgnān Dyōb, boŋ ábē bembapεε békabpé bad. Ambēl melemlem ne éché súu. Mod-téé andyé ngáne áhédé'áá. ¹² Ade bó moosyáál bémáá akód, Yesue anláá ábē bembapεε aá, “Nyélad ndyééd echě elyǝgé ásē. Ndyééd ké póg eebébé'.” ¹³ Né-óó, áde bémáá adyé bēnlād ndyééd echě enlyǝg ásē, enlón e'lón dyōm ne é'βε. ¹⁴ Anyín áde ábē bad bényíné nímén menyáké níme Yesue ábélé bēnhōb bán “Ne mbále, nkal e'dáádəŋ awě bēnhōbpē bán ǎpē á nkōŋsé mó nén.” ¹⁵ Yesue ambíí aá béhede mó akób ányáged mó ábé kəŋ. Né-óó, antīm ámbíd á ekone-mín.

*Yesue akii á mendib mín
(Mat 14.22-33; Mak 6.45-52)*

¹⁶ Ngukél, bembapεε ábe Yesue bēnkě á edib. ¹⁷ Bēnsól á bǝle-tē, béchabpé edib, bétimnád á Kapenahum. Ehíntén êmmăd apε áde Yesue éēpédéé wée bédíí. ¹⁸ Enén pónde epub é ngíne étómé'áá, épuutád-te mendib áte. ¹⁹ Bóob-póó bembapεε bēmmăd akε ké máyl méláán ké'ε méniin, dóó bényíné Yesue akag á mendib mín, átimnád benben ne ábab bǝle. Mbwóg ní ngíne ménkōb bó. ²⁰ Boŋ anláá bó aá, “Mε-εé ndé, nyéebáá'.” ²¹ Héé bétédé mó á bǝle-tē ne menyinŋe, ábwōg-ábwōg bēpēēn-ne bǝle á nkin wée békágé'áá.

Yesue mó adé ewele éche ébage' alongé

²² Néé bīn é'sánŋé, ndun e mod echě enlyǝg á múde mé edib nímíníí wée Yesue ne ábē bembapεε bēmbīdtē, bēnchem bán, ngukél echě entóm, bǝle e'hóg bēnpεn bóó bēmbē áhed. Bēmbīí-ε bán Yesue enkēnsónlé áwēd-te ne ábē bembapεε. Bēmbīí

bán ábē bembapεε bēnpεn bóo bēnkĕ. ²³ Myĵle mémpēe míme mémbíd á dyad á Tiberia mēmpĕ á nkin mé edib bēnbēn ne hōm áde ene ndun e mod éndyĕĕ e'wεle ámbíd echĕ Sánġwĕéé áamáá Dyōb aságnεn. ²⁴ Ade ene ndun e mod ényíné nén bán, Yesuε ne ábē bembapεε béesaá áhed, bénsōl á myĵle-tĕ wĕ, békĕ á Kapenahum, áke dé ahed Yesuε.

²⁵ Ade ábē bad bépédé á pεd e edib eníní, bényīn Yesuε. Bēnsēdéd mó bán, “A-meléed, pónde ehéé épédé hén?” ²⁶ Yesuε ankwentén bó aá, “Ne mbále, nlānge nyé nén mεé, saké menyáké míme mbéleé nkáá boŋ nyéhédé me. Nyéhede me áyāle e'wεle ábe nyédyédé boŋ nyĕkód-tε. ²⁷ Nyéewág ntŭ áyāle ndyééd echĕ ebōode', boŋ nyéwág ntŭ áyāle ndyééd echĕ ebág abé ne abé á alongé áde déemaá', chó-'aá ebage alongé áde déemaá'. Ene ndyééd chóo Mwán-a-Moonyon ábéé. Móo Dyōb Titée áhédé e'chem aá ábel nĕ.” ²⁸ Dóo ábē bad bēnsēdéd Yesuε bánken, “Cheé sétāngéné abel, ábel boŋ sébel mekan míme Dyōb áhedéé aá, sébel?” ²⁹ Yesuε ankwentén aá, “Dyam áde Dyōb áhedéé aá nyébel ádíi ádúbe me awĕ álómé.” ³⁰ Bēntimtén Yesuε bán, “Menyáké méhéé wébenlé míme sényīnnē boŋ sédúbé wε. Cheé mmōn wékoŋgé abel? ³¹ Abēd betaa bēndyĕ mána á ehyānge ngáne éténlédé á kálag e Dyōb nén bán, ‘Ambag bó e'wεle ábe é'bíde ádyōb aá bédyĕ.’ ” ³² Yesuε anhób aá, “Ne mbále, nlānge nyé nén mεé, saké Moseε móombĕ nyé ewεle éche ehúú ádyōb, boŋ echem Sán móombĕ nyé ewεle éche ehúú ádyōb. ³³ Ayāle me-εé ndé échĕ ewεle éche Dyōb ábágé, échĕ ehúú ádyōb, echĕ ábageé baányon bé

nkõjsé alongé áde déemaá’.”

³⁴ Dóo bélângeé Yesue bán, “A-Sán, bagé sé échén ewele pónde ésyāāl.” ³⁵ Yesue anláá bó aá, “Me-éé ndé ewele éche ébage alongé áde déemaá’. Kénzéé awě apedé áwêm, nzaa éekóbpé mós ámpē. Kénzéé awě adúbpé me, píd éekóbpé mós ámpē. ³⁶ Nlânge nyé nén meé nyényíné me bon nyéedúbpéé me. ³⁷ Bad bésyāāl ábe echem Sán ábágé me, bépě áwêm. Kénzéé awě apedé áwêm, meebánge mós akob. ³⁸ Ayāle meebídeé ádyōb ábel ngáne ébōhnedé me. Mpedé ábel ngáne ébōhnedé echem Sán awě alómé me. ³⁹ Bon nén ádíi mewēmten nime ane awě alómé me, aá átinté bad bésyāāl ábe ábágé me, meebódé ké nhóg, bon aá nīpuud bó moosyāāl á epun é asóg. ⁴⁰ Echem Sán ahede aá moosyāāl awě anyíné mwān, adúbé-’e mós, ákud alongé áde déemaá’. Měpuúd-te bó á epun é asóg.”

⁴¹ Abé bad bé Israel bēmbotéd anyoo áte tñgene Yesue, ahób áde áhóbé aá, “Meé ndé ewele éche ébíde ádyōb.” ⁴² Hē dóo behóbéé bánken, “Saá Yesue, mwān awě Josebe nén-e? Ngómē debí sáá ne nyan? Chán-nō áhelese áhōbē aá móbíde ádyōb?” ⁴³ Yesue anláá bó aá, “Nyésōg anyoo áte. ⁴⁴ Modmod éehēlēē-se ápe áwêm, ésebán Titée awě alómé me apééné mós áwêm. Měpuúd-te mós á epun é asóg. ⁴⁵ Eténlédé ngáne bekal bé’dáodəñ behóbé nén bán ‘Dyōb déyāgēd bó moosyāāl.’ Kénzéé awě awóge’, áyāgkē-’e wée Titée, apag áwêm. ⁴⁶ Eesaá nén bán, mod ké nhóg akényīn Titée. Ane awě abíde wée Dyōb mwēmpen móo akényīn Titée. ⁴⁷ Ne mbále, nlânge nyé nén meé, kénzéé awě adúbpé me ákūd alongé áde déemaá’. ⁴⁸ Me-éé ndé ewele

éche ébage alongé. ⁴⁹ Abēn betaa bēndyē mána á ehýáŋge, boŋ ké nê, bēnwē. ⁵⁰ Boŋ ewele éche ébídé ádyōb édé nyaa echê kénzée awē adyédé ch́ó éewáá. ⁵¹ Mε-εé ndé ewele éche ébage alongé éche ébídé ádyōb. Kénzée awē adyédé échê ewele, ábē á alongé á ngíndé ne á ngíndé. Echén ewele éche mébεé nyé édií echem yǎl echê mébē ábel boŋ ríkade alongé dé nkōŋsé.”

⁵² Ade ábē bad bēwógé nê, bēnlīŋ, bēn ne bēn bébootéd-τε mpentεν ní ngíne, bésεdté bánken, “Chán anén mod áhεle atéd eche yǎl, áβε syánē aá dédyág?” ⁵³ Yesuε anláá bó aá, “Ne mbále, nlāŋge nyé nén mée, nzé nyéedyéde yǎl e Mwān-a-Moonyoŋ nyēmwe-’ε nímē mekií, nyéekudté alongé áde déemaá’.” ⁵⁴ Kénzée awē adyédé echem yǎl, amwé-’ε nímēm mekií, ákūd alongé áde déemaá’, mēpuúd-τε mó á epun é asóg. ⁵⁵ Ayāle echem yǎl ch́ô ekōŋté ndyééd abé, nímēm mekií-’ε mékoŋ mmítéd abé. ⁵⁶ Kénzée awē adyédé echem yǎl, amwé-’ε nímēm mekií, alyagé adé ne mε, mε-’ε nlyagé ndé ne mó. ⁵⁷ Titée awē akāθ boŋ bad bēbé á alongé, mó alómé mε, mó akāθ-’ε boŋ mbé á alongé. Melemlem née kénzée awē adyédé echem yǎl, mébenlé abé á alongé. ⁵⁸ Né-ζó, mε-εé ndé ewele eche ébídé ádyōb. Meésáá nēŋgáne ewele éche ábēn betaa bēndyēē, boŋ ké nê bēwé. Boŋ kénzée awē ádyē echem yǎl ábē á alongé á ngíndé ne ngíndé.”

⁵⁹ Yesuε anhób nímén mésyāāl áde áyágté’áá á ndáb e mekáne e bad bé Israel á Kapenahum.

E’yale ábe Yesuε é’pεene’ alongé áde déemaá’

60 Ade bad hiiin ábe béhídé'áá Yesue béwógé mímén mekan bénhōb bán, “Adén ayáge álélé ahíd. Nzéé ahéle ákob ene ndín e dyam?” 61 Yesue ambíí aá, bényonje áte áyāl echê, né-ǎó anláá bó aá, “Nê áwag nyé á yǎl-ε? 62 Chán-nō nyéhōbpē áde nyényinnē Mwǎn-a-Moonyon apumme' ámbíd ámín wéε ámbídtē! 63 Edǎǎdǎn é Dyōb chōó ébage' alongé. Ekob é yǎl éesaá dyamdiam. E'yale ábe rílangé nyé é'díi edǎǎdǎn ne alongé. 64 Bon ké nê, nyé donje á bad nyéedúbpeé.” (Bootya á pónde éche Yesue ábóótédé ayáged, ambíí bad ábe béedúbé, abíí-'ε mod awě äsōm mó.) 65 Ambád ahób aá, “Nén dōó ákǎó bon nláá nyé meé modmod eéhēlēē-se ápe awēm kǎān né echem Sǎn abelé bon ápē áwēm.”

66 Bootya ene pónde nê dēnkǎn bad ábe béhídé'áá Yesue bésóg mó ahíd, bétim-me ámbíd. 67 Héε Yesue ásedtēé ábē bembapeε dyōm ne bébe aá, “Nyémpē nyéhēde atim ámbíd-ε?” 68 Simōn Petro ankwentén mó aá, “A-Sǎn, wéε nzéé sékéé? Wε-εé ewóó e'yale ábe é'kǎǎ' bon mod ákūd alongé áde déemaá'. 69 Sédúbpé sēbíí-'ε bán, wε-εé edé Ane-awě-Asáá awě abíde wéε Dyōb.” 70 Héε Yesue ákwentanné bó aá, “Eesaá mbále bán mpwεdé nyé bad dyōm ne bébe-yε? Bon ké nê, nyé mod nhóg adii mod a Satan.” 71 Judasε, mwǎn a Simōn Iskariōde móo Yesue áhóbé'áá. Kénεε ámbēē mbapeε nhóg átintē e bembapeε dyōm ne bébe, mó anké Yesue ntúrē.

7

Yesue ne badnyan

1 Ambid e nímén méšyāāl, Yesue akagé'áá mebwóg ne mebwóg á mbwóg e Galilia. Enkëndəngé ake á mbwóg e Judeya áyāle bad bé Israel béhéde'áá mó awúu. 2 Βααβ-ρσός, Ngande e E'bem * e bad bé Israel embé benben. 3 Héε Yesue baányanη bəlāngεé mó bán, “Etəngéné áden abwóg á hōm ahide, éke á mbwóg e Judeya ábel bad ábe béhíde wε bényín menyáké míme ébeléé. 4 Mod eébélēē nsón á e'koηnéd-te, nzé aheude áá móbyéen. Ngáne ébeléé nímén mekan méšyāāl ébel nkōηsé řsyāāl mbíi wε.” 5 (Ké Yesue baányanη bénkēndúbéé mó.) 6 Héε Yesue álāngεé bó áá, “Echem pónde eépédéé. Boη ne nyé, echen pónde edé pónde ésyāāl. 7 Nkōηsé méehelée-se řkōō nyé. Boη řkósό με áyāle mpanlad bó nímāb mewusé áte. 8 Nyébó nyékag á ngande. Méekaá áwed áyāle echem pónde eépédéé.” 9 Yesue amaa'-áá ahób nê, abé abé á Galilia.

Yesue akii Ngande e E'bem á Jerusalem

10 Ambid e pónde áde Yesue baányanη bémáá ake á Ngande e E'bem, mómpē ankě áwed. Boη enkēnlúmédte yāl. Ankě nyaa echě bad bénkēmbíí'ε ndín e mod echě ádíí. 11 Benkamlenε bé Israel béhéde'áá mó á ngande-tê, bésedte bánken, “Héé múmó ádíí?” 12 Afintê e ndun e mod echě embé á ngande-tê wê, donje á bad béhóbé'áá bán, “Adíí mod a bwám,” ábíníí-'ε bán, “Aáy, adoge bad dogén.” 13 Boη bó modmod bénkēmbídédte yāl áwed áyāle bebáá'áá bad bémbáá bé Israel.

* 7:2 Ngande e E'bem: ebédée ngande echě bad bé Israel bébéle'áá ákamten pónde echě ábāb betaa bédyéé'áá á e'bem-tê áde bébéde á ehyānge, áde béhídté á Egipto.

14 Ade ngande ékwógé apε áfíntê, Yesuε ankě asól á Ndáb-e-Dyöb, ábootéd ayáged. 15 Yäl enkóm benkamlεε áte bwâmbwam tâηgene ádē ayáge. Né-óó, bēnsεδéd bánken, “Chán anén mod ámwédé mímén mam mésyāāl abii áde éekii’έ á esukéλε é mbéndé?” 16 Héε Yesuε ákwentanné bó aá, “Ayáged áde n’γágtεέ déesaá ádēm. Adii áde mod awě alómé mε. 17 Kénzée awě awémténé abel ngáne Dyöb áhεδέέ, äbīī ké ádēm ayáge ahúú ne Dyöb ké’ε ahúú ne mmén. 18 Kénzée awě ahóbne echě kunze, abele nê áhεδe eche yäl edúbé. Boη mod awě ahεδte’ mod awě alómé mó edúbé, asáá nlém á abum, eesaá mod a metóm. 19 Eesaá mbále nén bán, Mosεε abagé nyé mbéndé-yε? Ké nê, nyé modmod eehídée mbéndé éched. Cheé ékáá boη nyéhεδé mε awúú?” 20 Dóó ene ndun e mod ékwentanné mó bán, “Edædæη é mbéb édé wε áte. Benzébádé béhεδe wε awúú?” 21 Yesuε ankwentén bó aá, “Nsón nhóg míme mbélé, nkómté nyé moosyāāl yäl áte. 22 Mosεε ambě nyé mbéndé aá, nyéyage áben bán (kénée édíí bán, saké Mosεε móómbotéd. Abēn betaa bóó bēmbotéd). Né-óó, nyéyage bad á Mbwε-mé-nkóme-áte. 23 Nzé béyágé mod á mbwε-mé-nkóme-áte, âbel béēbōō’ mbéndé e Mosεε, cheé ékáá boη nyéliηné mε áyāle nídídé mod bwâm á mbwε-mé-nkóme-áte. 24 Nyéekáádté dyam áde mbélé ngáne nyényíné, nyékáad ngáne éhεδnadté.”

Bán Yesuε mǎdé Ane awě básiné-yε?

25 Héε dóó donje á bad bé Jerusalem béhóbεé bánken, “Saá mod awě béhεδέέ awúú mǎ nén-ε? 26 Nyénǎné’, akanle bad á tâl e ékwée, bad bémháá béesaá-’aá mó dyamdyam aláa. Kapóg

bébíí bán ne mbáale, môdé Ane-awě-Béwógté-yōō!
²⁷ Boη éheleé-εε ébé nê, áyāle debíí bán pónde echě Ane-awě-Béwógté ápeé, modmod éebíí'έ wée ábídé. Debíí wée anén mod ábídé.” ²⁸ Yesue ambé áyāgtē' á Ndáb-e-Dyōb. Ade áyāgtéé dōo áchāgté ehób ámīn aá, “εε, nyēbíí me bwām, nyēbíí-ε wée mbídé. Meépedeé hén ne mmēn. Ane awě alómé me adé mbáale. Nyéebíí'έ mó, ²⁹ boη me pen mbíí mó áyāle áwē dōo mbídé, mó-'aá alómé me.” ³⁰ Ade áhóbé nê, béhédé'áá mó akób, boη modmod enkēmbánné mó ké ekáá á yāl, áyāle eche pónde enkēmpaá. ³¹ Ké nê bad híin átínté ene ndun e mod béndūbē mó. Béhóbé'áá bánken, “Ade Ane-awě-Béwógté ápeé, ābēl e'chemléd bé menyáké, míme ítómé míme anén mod ábélé-yε?”

Befarisia bélómé bad ákób Yesue

³² Befarisia bēnwōg née bad bényonγεé áte, béhóbéé mímén mekan tēηεne Yesue. Né-ōó bōobe beprise bémbáá bēnlōm bembalede ákób mó. ³³ Héε Yesue áhóbéé aá, “Ndíi ndé ne nyé, boη mwāmpīn ní pónde mēsū ámbíd wée ane awě alómé me. ³⁴ Ámbíd enê, nyéēhēd me, boη nyéenyínné, wée mébēē-ε nyéehenlé ape áhed.” ³⁵ Nê dēmbēl benkamleε bésēdté nhóg ne aníní bánken, “Héé anén mod múmó áhedéé ake, wée syánē déehenlé mó anyín? Ahede ake á alon á Grikia wée ábēd bad bédíí á ebwóg áyāged bad bé Grikia-yε? ³⁶ Ahóbe' aá deéhēd mó boη déenyínné mó. Aá déehenlé-ε ape wée móbēē. Cheé nê álūmtéé?”

E'dib bé mendib mé alongé áde déemaá'

³⁷ Epun é asóg é ngande éche éntōmtēn etógnén abé áyāle ene ngande émpě. Yesue antyéém ámīn, dǒo áchágté ehób ámīn, áhōbē aá, “kénzée awě píd ékóbé áhyag áwēm áhye ámwē mendīb. ³⁸ Kénzée awě adúbpé me, Kálag e Dyōb ehóbe aá, ‘e’dīb bé mendīb mé alongé bēbīdē mó áte é’sobpe.’ ” ³⁹ Edǎǎdǎj éche Esáá chǒo Yesue áhóbé’áá. Chǒo bad ábe béndūbē mó béntǎngēnnē akud. Ene pǒndé né Edǎǎdǎj éche Esáá éepēdēē wée ábē bad áyāle ene pǒndé ne Dyōb déélūmtēē ehúmé éche Yesue.

Bad békábné áte á atón áde Yesue

⁴⁰ Donje á bad átíntē ene ndun e mod ábe bēnwōg née Yesue áhóbéé nímén mekan bēnhōb bán, “Ne mbále, anén mod adíi nkal é’dǎǎdǎj awě ǎpě.” ⁴¹ Bad bēmpēe bēhóbé’áá bán, “Mǎdé Ane-awě-Béwǒgté awě ǎpě.” Ké nē, bēmpēe bēhóbé’áá bán, “Ane-awě-Béwǒgté eéhēlēē-se abíd á Galilia. ⁴² Eténlédé á Kálag e Dyōb nén bán, Ane-awě-Béwǒgté ábīd á túmbé e Dabid á dyad á Betelhem wée Dabide ámbīdtē.” ⁴³ Né-ǎǎ, bad bēnkabén áte á atón áde Yesue. ⁴⁴ Donje á bad bēhédé’áá mó akób boj modmod enkēmbánné mó ké ekáá á yǎl.

Baámbáá bé Israel béekwenteneé Yesue adúbe

⁴⁵ Kǎǎne ásōg bembǎledē bé Ndáb-e-Dyōb bēntīm wée beprise bēmbáá ne Befarisia. Héē beprise bēmbáá ne Befarisia bésēdtéé bǒ bánken, “Cheé ékǎá boj nyéperene mó hén?” ⁴⁶ Héē ábē bembǎledē bēhóbéé bán, “Modmod eéhóbéé ndín é mam éche anén mod áhóbéé.” ⁴⁷ Dǒo Befarisia bésēdtéé bǒ bánken, “Nédē ane mod adogé kǎǎne nyémpē-yē? ⁴⁸ Nyékényīn née mod ambáá ké’ē

Farisia nhóg ádubpé mô? Ké nhóg eédúbpéé mó. ⁴⁹ Enén ndun e mod eebíi'é mbéndé e Mose. Né-ó ebómán édé ne bó.” ⁵⁰ Farisia nhóg awě béchágé'áá bán Nikodemuse awě ansébé Yesue ake dé anyín, anláá bó aá, ⁵¹ “Eche syánē mbéndé eébagεé kunze nén dékógsen mod áde déekáadtéé mó, áwóglen dyam áde ábélé.” ⁵² Ade áhóbé nē, bēntimtén mó bánken, “We ámpē ebídé á Galilia-ye? Héd áte á Kálag e Dyöb, wěnyín nén wě nkal é'dáádəh eebídéé á Galilia.”

Mmwaád awě akábé asón

⁵³ Ámbíd enē moosyáál ansú áwe ndáb.

8

¹ Yesue pen ankě á Ekone é Menzab. ² Néε bīn é'sángé mbwεmbwε, antīm ámbíd á Ndáb-e-Dyöb. Ndun e mod empě áwē. Andyεé ásē ábootéd bó ayáged. ³ Bemeléede bé mbéndé ne Befarisia bēmpεén mmwaád nhóg áwē, awě békóbé néε ákábéé asón á ndáb e e'wóngé. Béntī ane mmwaád áfīntē echáb, ⁴ boŋ bēlāngē Yesue bán, “A-meléed, békóbé anén mmwaád néε ákábéé asón á ndáb e e'wóngé. ⁵ Á mbéndé eche syánē, Moseε anhób aá, enén ndín e mmwaád bēlūm chó meláá káəh áwē, chán-nō wε-'ε éhóbé?” ⁶ Bēnsédéd mó nē áhíí mó melám, ábél nén békóben mó awusé. Boŋ Yesue anwúlén ásē, ábootéd bwēm atel á ndəəb-tē ne ábē e'mii. ⁷ Ade bēbádnéné mó aseded, antíy yál ámīn, aláá bó aá, “Nyé ké ahéé awě eébélé mbéb ábē mod a'só álúum mó meláá.” ⁸ Anwúlén mó ásē ámpē átelé' ábē bwēm á ndəəb-tē. ⁹ Ade ábē bad bēwógé nē bēmbootéd ahide nhógē-nhógē. Bad bēmbáá bóə bēnsēbē ake, boŋ bésad bēhídē'. Káəh

ne á asóg Yesue mwěmpen anlyəg, ane mmwaád-te abé atyéém áhed. ¹⁰ Ade Yesue átíídé yəl ámín, dóo ásedteé ane mmwaád aá, “A-mmwaád nén, héé bad ábe bépééné we hén bédíí? Modmod eélyəgeé hén awě ahóbé aá bėwúu we-yé?” ¹¹ Ane mmwaád ankwentén aá, “A Sáj modmod.” Héé Yesue álāngéé mó aá, “Né mǎmpē méehóbpé mée bėwúu we. Kǎg we, bonj weébēlē mbéb ámpē.”*

Yesue mǎdē e'nyínen bé ekide bé nkōjsé

¹² Yesue anláá ábē bad ámpē aá, “Mée ndé e'nyínen bé ekide é' bad bé nkōjsé. Kénzée awě ahíde me, éekaá á ehíntén-tē, bonj ákūd e'nyínen bé ekide ábe é'bage' alongé.” ¹³ Dóo Befarisia bėlāngéé mó bán, “Ebíde echon yəl mbónj, né-óó mbónj echon eekobnedé.” ¹⁴ Yesue ankwentén aá, “Kénee mměn mbíídéé echem yəl mbónj, echem mbónj edé mbále, áyāle mbíí wée mbíídé, mbíí-é wée nkagké, bonj nyé, nyéebíí-é wée mbíídé, nyéebíí-áa wée nkagké. ¹⁵ Nyékáadte bad á nyaa e moonyonj. Meekáádtéé modmod. ¹⁶ Ké menkáádt-te ké káádtén, echēm mbakú edé mbále, áyāle meekáádtéé ne mměn, bonj nkáadte, ne ane awě alómé me. ¹⁷ Néé behúde ké nē áte, á mbéndé echēn, éténlédé nén bán nzé bad bébe bėbídé dyam mbónj, bonj behóbé melemlen mé dyam, né ene mbónj edé mbónj e mbále. ¹⁸ Nyéebíí-óó nén bán nwóó mbónj ébe, mměn ne mod awě alómé me, awě adé echem Sáj.” ¹⁹ Héé dóo Befarisia bėsēdtéé mó bán, “Héé sóó ádíí?” Ankwentén bó aá, “Nyéebíí-é me, nyéebíí-áa ké echem Sáj. Nzé nyémbíí me, né nyéebíí káəne echem Sáj.”

* **8:11** Ekud e kálag é'só éewóó'é échén eped (7.53-8.11).

20 Yesue anhób ábén e'yale áde áyágtéé á Ndáb-e-Dyöb-te, bēnben ne wée békongéé mōné. Bōḡ modmod enkēnkóbpé mō, áyāle eche pōndé echē békóbeé mō enkēmpaá.

21 Yesue anláá ábē bad ámpē aá, “Měkě, nzé mmaá-'ε ake, nyéēhěd me, bōḡ nyéenyínné, né-óó nyéēwē áwēn mbéb-te. Wée mébēē, nyéehēnlé ape áhed.” 22 Héé bad bémbáá bé Israel bésēdtéé bán, “Ahóbe' aá, wée mókéé aá syánē déehēnlé ape áhed, múmó ahede yǎl awúu-yε?” 23 Anláá bó aá, “Nyēdii bad ábe bēbídé ásē wén, bōḡ me pēn, mbídé ámīn. Nyēbídé á nkōḡsé wén, me pēn, meebídéé á nkōḡsé wén.” 24 Nē dōó ákáá bōḡ rílanḡē nyé mēé, “Nyéēwē áwēn mbéb-te. Nzé nyéedúbpe bán, ‘Ndii Mod Awě Ndii,’ né nyéēwē-'ε áwēn mbéb-te.” 25 Héé bésēdtéé mō bánken, “Nzé-módé édii?” Dōó ákwēntanné bó aá, “Nyaa e mod echē rílanḡé nyé se á mbooted mēé ndé chōó rídii. 26 Nwóó mam híin ahób tāḡḡene nyé, ne ákáad nyé. Bōḡ mod awě alómé me adii mod a mbále, mekan nímě rílanḡe-'áa nyé hén á nkōḡsé médii mekan nímě ríwógé áwē.” 27 Ade Yesue áhóbé nē, bēnkēnsóḡtēnné bán Sáá awě adé ámīn mōó áhóbéé. 28 Héé Yesue álāḡḡéé bó aá, “Pōndé echē nyémadté Mwān-a-Moonyōḡ abane ámīn, dōó nyébfí'ε bán, ‘Ndé mod awě ríhóbé mēé ndé.’ Nyēbíi-'ε bán, meébēlēē dyamdyam ne kunze echēm, bōḡ dyam áde ríhóbéé ádii dyam áde echem Sāḡ áyágté me. 29 Ane awě alómé me, adé-'ε ne me, eéēdtéé mměmpēn, áyāle mbele' mekan nímě mébōḡnéde mō.” 30 Bad híin ábe bēnwōḡ nēé Yesue áhóbéé nímén mekan, bēndūbē mō.

Nzéé adé sád awě bad bé Israel?

31 Hée Yesue álângeé bad bé Israel ábe béndübē mó aá, “Nzé nyédii nyéhíde’ ádēm ayáge, né nyékõhté ábēm bembapεε abé. 32 Né nyéεbñi mbále, né ene mbále éhūd-te nyé á mehan-tê.” 33 Bēnkwentén bán, “Sédii nchyaátén míme Abrahamε. Séébédéé-’áa ntân a mod mbéd. Chán-nō éhεle éhōbē wεé séebáá á mehan-tê?” 34 Yesue ankwentén bó aá, “Ne mbále, nlânge nyé meé, kénzεé awé abele mbéb adii ntân a mbéb. 35 Ntân eebágkε á túmbé-te abé ne abé, bon mwän a túmbé, adii mwän a túmbé pónde ésyāäl. 36 Né-óó, nzé Mwän ahúde nyé á mehan-tê, né dyamdyam déetédte nyé ntân ámpē. 37 Mbíi meé nyédii nchyaátén míme Abrahamε, bon ké nê, nyéhεde me awúu, áyāle nyééhēdēē ádēm ayáge ahíd. 38 Nlânge nyé mekan míme echem Sán álúmté me. Nyé-’ε nyébele mekan míme echen sán álángé nyé.”

39 Bēnkwentén mó bán, “Abrahamε adii eched sán.” Yesue anláá bó aá, “Nzé nyénkõh bán ábe Abrahamε abé, né nyébele’ mekan míme Abrahamε ábélé’áa. 40 Mekan mésyāäl míme ríkembenlé rídii áláa nyé mbále echē ríwógé wεε Dyõb. Kénê, nyéhεde me awúu. Abrahamε eébele’áa, enén ndín e dyam. 41 Nyébele mekan míme echen sán ábeléé.” Bēnkwentén mó bán, “Dyõb dēmpen-εé séwóó née eched Sán, béēchyáa-’áa sé á asón.” 42 Dóó Yesue álângeé bó aá, “Nzé Dyõb dēnkõh echen Sán abé, né nyédáó me, áyāle mbídé wεε Dyõb ndé-’ε hén bõõb. Meépedεé ne mmën, bon mó alómé me. 43 Nzom echē ekáó bon nyééhēdē’ me ehób awóg, edii nyééhēdēē ábēm e’yale awóg. 44 Nyédii bán ábe echen sán, Satane, míme mewēmten

mó-'aá nyédóó ahíd. Se á mbooted, adii ane awě awúe' bad, eékwógnédéé mbále mbéd, áyāle mbále eésaá mó áte. Nzé akale metóm, né abele nime nsón áyāle adii nkal a metóm, abé-'e sáá a metóm. ⁴⁵ Nyéedúbpéé me, áyāle nkanle nyé mbále. ⁴⁶ Nyé ahéé ahele alúméd aá, mbelé mbéb? Nzé nkanle nyé mbále, cheé-ᵑ ékóó boᵑ nyéedúbpé me? ⁴⁷ Kénzée awě ahúú ne Dyōb, awóge eyale é Dyōb. Nzom echě ekáó boᵑ nyéewóglán edii, nyéesaá bān bé Dyōb.”

Bad bé Israel béekobéé ayáge áde Yesue

⁴⁸ Héé ábê bad bé Israel bétimtanné Yesue bánken, “Eesaá mbále bán, sēnkāl mbále áde séhóbé bán, edii mod a Samaria, edáádəᵑ é mbéb édé-'e wε áte-yε?” ⁴⁹ Ankwentén bó aá, “Edáádəᵑ é mbéb eésaá me áte. Mbage echem Sáᵑ edúbé, boᵑ nyépeᵑ nyéēbāgēē me edúbé. ⁵⁰ Mmēn meéhēdtēē yāl edúbé, boᵑ mod adé awě aheᵑe' aá níkud edúbé, mó-'aá, abage mbakú echě etāᵑgéné. ⁵¹ Ne mbále, nlāᵑge nyé meé, kénzée awě abele' chōm-éé ní'yágtéé, éewáá mbéd.” ⁵² Dóó ábê bad belāᵑgēé mó bán, “Bóob dóó sébíí bán, edáádəᵑ é mbéb édé wε áte. Abrahamε anwé, bekal bé'dáádəᵑ bómpē bēnwē. Boᵑ bóob éhōbē wεé mod awě adúbpé wε, éewáá mbéd. ⁵³ Echēd sáᵑ Abrahamε anwé. Ewémtné wεé mótmē mó-yε? Bekal-bé-e'dáádəᵑ bómpē bēnwē. Nzé-módé wewe éwēmtanné wεé módé?” ⁵⁴ Héé Yesue ákwentanné bó aá, “Nzé nhēdte echem yāl edúbé, né échē edúbé éesaá dyamdyam. Echem Sáᵑ awě nyéhóbéé bán mó adé nyé sáá, mó abage me edúbé. ⁵⁵ Nyéēbī' é mó mbéd, boᵑ mbíí mó. Nzé nhóbé meé meebī' é mó,

né ndé nkal a metóm née nyé. Bon mbíí mó, mbele-
 'ε mam míme áhóbεέ. ⁵⁶ Echen sán Abrahamε ambé
 menyiŋge aá, móɔnyĩn epun éche mépεέ, annýĩn-
 ne chό, abé-'ε menyiŋge bwámbwam.” ⁵⁷ Dóo
 bésεdtεέ mó bán, “Ade wéepēdēē móom mé mwé
 métáan, wεέ mónyĩnē Abrahamε-yε?” ⁵⁸ Yesue
 ankwentén bó aá, “Ne mbále, nlāŋge nyé nén meé,
 byánán béchyāā Abrahamε, ‘Ndé.’ ” ⁵⁹ Ade ábē
 bad béwógé nê, dóo bébóótédé meláá ahεd, álúm
 mó. Bon Yesue ansóom, abíd-te á Ndáb-e-Dyöb.

9

Yesue achöŋté mod awě béchyááné ndím

¹ Ade Yesue átómεé, dóo ányíné mod awě
 béchyááné ndím. ² Dóo ábē bembapεε bésεdtεé
 mó bán, “A-meléed, mbéb míme nzéé ríkóó bon
 béchyáá anén mod ne ndím? Mbéb míme mwën-ε,
 káa míme sáá bó nyan?” ³ Yesue ankwentén bó
 aá, “Saké míme mbéb ríkóó, saá-kaá míme sáá bó
 nyan. Bon nén ábénlédé ábel ngíne e Dyöb ébíd
 áwed áwē yäl. ⁴ Ngáne bĩn é'díi ényĩnneé ámĩn,
 detāŋgéné débel nsón míme ane awě álómé me.
 Ehíntén ékwógé apε áde mod éehenlé nsón abel.
⁵ Bóob áde rídíi á nkōŋsé, me-εé ndé e'nyĩnen bé
 ekíde bé nkōŋsé.” ⁶ Ade Yesue ámáá ahób nê,
 ansob aléed á ndóob, atób dó bon áwōgtē ane mod
 a ndím á mĩd, ⁷ álāŋgē mó aá, “Kāg, éwobe e'só á
 eton é Silom” (ádē dĩn ádé nén bán, “Bélómé”).
 Né-óó, ane mod ankě, áwōbē-'ε mĩd. Antĩm ámbíd,
 ányĩne'.

⁸ Héε bad ábe bémbĩi mó ne bad ábe bényínáá
 ngáne áchómεé bwēm, bésεdtεé bán, “Saá anén

mod ayǒgké adyεε ásē, áchōmē bwēm-ε?” ⁹ Donje dénhōb bán, “Môdé,” ábíníí-’ε bán, “Aáy! Awágne mó wágnén.” Boη ane mod mwēn anhób aá, “Mmēn-εé ndé.” ¹⁰ Dóo bésεdteé mó bán, “Chán-nō émwédé abooted dé anyínen?” ¹¹ Ankwεntén bó aá, “Mod awě béchəgεé bán, Yesuε, antób eləob, awógéd me chό á mǐd, aláá-’ε me aá ríke á etoη é Silom, ríke ríwobe mǐd. Né-óó, menkě. Awobe áde ríwóbpé mǐd, ríbootéd-te anyínen.” ¹² Bēnsedéd mó bán, “Héé ane mod adíí?” Ankwεntén bó aá, “Meebíí’ε.”

*Befarisia béhéde áte ngáne
Yesuε áchóhété mod a ndím*

¹³ Bēnkεén ane mod awě ankwě ndím wées Befarisia. ¹⁴ Epun éche Yesuε ántōbpé eləob ánēdē-’ε ane mod mǐd áte, ébédeε Mbwe-mé-nkóme-áte. ¹⁵ Befarisia bēnsedéd ane mod awě ankwě ndím ámpē bánken, “Chán émwédé abootéd dé anyínen.” Héε álāηgεé bó aá, “Antób eləob awógéd me á mǐd. Ade ríwóbpé e’só, ríbootéd-te anyínen.” ¹⁶ Hê dóo donje á Befarisia béhóbεé nén bán, “Anén mod awě abelé ádén dyam, eéhēlēε-se abé mod awě Dyōb álómé, áyāle eékoηgεé mbéndé e Mbwe-mé-nkóme-áte.” Boη ábíníí-’ε béhóbé’áá bánken, “Chán mod a mbéb áheleεε ábelé’ échén ndín e menyáké?” Nén dēmpεén nkabén átínté echáb. ¹⁷ Né-óó, Befarisia bēnsedéd ane mod ámpē bánken, “Ngáne éhóbé wεé mōbelé boη ényínne’, cheé éwóó ahób á yǎl echê?” Héε ane mod ákwεntanné bó aá, “Adíi nkal é’dáédəη.”

¹⁸ Ké nê, bad bé Israel bēnkéndúbéé bán, ane mod ansébé ndím akwε. Nê dēmbēl bēnchēlé sáá bó nyan. ¹⁹ Bēnsedéd bó bánken, “Nyéε nyéchyáá

anén mod awě nyéhóbé bán, béchyáá ne ndím-ε? Chán-nō ébénlédé bonj anyinnē bɔɔb?” ²⁰ Dɔɔ sáá bó nyanj békwentanné bán, “Sébíí bán awɛd mwǎn mǎdé, sébíí-’ε bán bénchyāā mó ne ndím. ²¹ Bonj séékoo’é abíi ngáne ámwédé anyínɛn, séebíi-’áa mod awě abelé bonj anyinne’. Nyésɛdte mó, eésáá mwéndem, mwěn áhǎb.” ²² Bénhǎb nê áyǎle bébáá’áá bad bé Israel. Bad bé Israel bénhǎb bán, kénzée awě adúbpé áá Yesue mǎdé Ane-awě-Béwǎgté, bėnan mó á ndáb e mekáne. ²³ Nê dɔɔ dɛnkǎj bonj sáá bó nyanj béhób bán, “Nyésɛdte mó, eésáá mwéndem, mwěn áhǎb.”

²⁴ Héε ábê bad bé Israel béchɛnléé ane mod awě Yesue ándidte bwám ngen échě élónténé ébε, bonj bélǎngē mó bán, “Kál echonj mbále á dɛn á Dyǎb. Sébíí bán anén mod awě achǎnté wε adíi mod a mbéb.” ²⁵ Dɔɔ ane mod átímtanné bó áá, “Meebíi’ é mε ké adé mod a mbéb ké’ε eésáá. Dyam ahóg áde mbíi, áde nén, menkwě ndím bonj bɔɔb nnyinne’.” ²⁶ Héε básɛdteé mó bánken, “Cheé ámbɛnlé bonj ébootéd anyínɛn?” ²⁷ Ankwentén bó áá, “Mmaá nyé aláa bonj kénê, nyéedúbpée mε. Cheé nyéhɛdée bán níláa nyé ámpē? Nyémpē nyéhɛde’ ábē bembapεε abé-yε?” ²⁸ Héε básyáá’ é mó, béhǎbē bán, “Wε-εé edé mbapεε awě ane mod. Sédíi bembapεε ábe Moseε. ²⁹ Sébíí bán, Dyǎb dénhǎb wée Moseε, bonj séebíi’ é wée anén mod pɛn ábíde.” ³⁰ Ane mod ankwentén áá, “Nén áde nkǎmtɛn ní yǎl áte. Nyéebíi’ é wée ábíde, bonj kénê abelé nnyinne’.” ³¹ Debíi bán, Dyǎb déekwentánné mekáne mé bad bé mbéb, bonj akwentan mekáne níme bad ábe bébage mó edúbé, bébelé-’ε mam níme áhɛdée. ³² Taasε nkǎjsé níbootad mod eéwǎgēē mbéd, bán

mod abelé mod awě béchyáané ndím anyinne'.
³³ Nzé anén mod awě achōnté me enkembé mod a Dyōb, né eéhele'aá-se ábel enén ndín e dyam."
³⁴ Dóo ábê bad békwentanné mó bán, "Béchyáá wε á mbéb-te, ékwōg-ke á mbéb-te, boη bοοb éhede sé ayáged-ε?" Héε dóo bébíté mó á ndáb e mekáne.

Ndím e edóðəŋ

³⁵ Ade Yesue áwógé bán bébíté ane mod awě ânchoódté á ndáb e mekáne, anhed mó. Ade ányiné mó, ansedéd mó aáken, "Edúbpé Mwǎn-a-Moonyon-ε?"
³⁶ Ane mod antimtén mó aá, "A-Sǎŋ nzéé adé Mwǎn-a-Moonyon, láá mé ábel nén rídúbe mó?"
³⁷ Yesue anláá mó aá, "Emaá mó anyín, nyúmō-'aá nyékale' nén."
³⁸ Héε ane mod áhóbéé aá, "A-sǎŋ, ndúbpé!" Abwóg-ke mebóbōŋ ábe mó edúbé.
³⁹ Yesue anhób aá, "Mpedé á nkōŋsé wén, ákáad bad ábel nén bad ábe békwédé ndím bényínen, ábe bō-'ε bényinne', békwε ndím."

⁴⁰ Ade donge á Befarisia ábe bōobe Yesue bémbē áhed béwógé nê, bēnsedéd mó bánken, "Sêdúbpé bán, weehóbéé wεé sémpē sêkwedé ndím?"
⁴¹ Yesue anláá bó aá, "Nzé nyênkwε ndím, né mbéb méesaá nyé á yǎl. Boη bοοb áde nyéhóbéé bán nyênýinne', mbéb rídíí rídé nyé á yǎl."

10

Ngan e Nnən a rídyəŋ ní mbód ne éche mbód

¹ Yesue anhób aá, "Ne mbále, nlânge nyé mεé, kénzéé awě eépoa á mmwε mé abem á mbód, boη átím achágé pεd empée, adii nchíb, abé-'ε mod e ewúen. ² Mod awě apoo' á mmwε mé abem môdé

Nn̄n̄n̄ a r̄dȳn̄ m̄ mbód. ³ Mod awě an̄one abem adibnad m̄ ekob. Ach̄age mbód t̄é ne d̄in, áb̄idn̄ē-’ε ch̄ó. ⁴ Ab̄idn̄ē-’aá ch̄ó, atómén ch̄ó, ch̄ó-’ε éh̄idē m̄, áȳāle éb̄íí éche eh̄ób. ⁵ Bon̄ éch̄ē mbód éeh̄id̄éé nken mbéd. Ebelé’ éb̄āā’ m̄ á ȳāl b̄áán, áȳāle éechem̄éé éche eh̄ób.” ⁶ Yesue ankalé b̄ó enén ngan bon̄ b̄enk̄ens̄ónt̄énn̄é.

*Yesue aá m̄ó m̄ódē
Nn̄n̄n̄ a r̄dȳn̄ m̄ mbód a bw̄ām*

⁷ Né-óó, Yesue ambád ámp̄ē aá, “Ne mbále, nl̄ange nyé n̄én m̄ε-éé, m̄éε ndé mm̄w̄ε mé ekob w̄éε mbód époo’é. ⁸ Byánán m̄ěp̄ě, bad b̄esȳāēl ábe b̄ésébp̄é ap̄ε b̄ébéd̄éε bech̄īb ne bad b̄é ew̄īen, bon̄ mbód éek̄enw̄óḡénn̄é b̄ó. ⁹ M̄ε-éé ndé ekob. Kénz̄éé awě apoo’ áw̄ēm, ák̄ūd e’soos̄on̄. As̄ōl, ab̄id-’te ésebán mod atagte m̄ó. Akud-’te kéchéé éche áh̄ed̄éé. ¹⁰ Nch̄īb apag d̄ás̄ō ách̄īb, áw̄úu ne áb̄ébed. Mpedé ábel bon̄ b̄ékud alongé áde álóné mbon. ¹¹ M̄ε-éé ndé nn̄n̄n̄-a-mbód a bw̄ām. Nn̄n̄n̄-a-mbód a bw̄ām adé mbon̄s̄én áw̄é á nl̄ó míme éche mbód. ¹² Mod awě b̄étédé á ns̄ón tédén, án̄n̄ mbód, áde mw̄ēn éesaá nn̄n̄n̄-a-mbód, áde éesaá-’aá nw̄óó-mbód, ánȳín̄éé nȳín̄én n̄éε nḡā eh̄úé’é, ách̄ēn̄ē mbód, atóm meh̄élé. Ene p̄óndé d̄óo nḡā ésoḡéé mbód, éch̄ín̄í-’ε ép̄ánt̄éd áte. ¹³ Ane mod atóme meh̄élé áȳāle adii mod awě b̄étédé á ns̄ón tédén, eew̄ōn̄éé éch̄ē mbód p̄óndé. ¹⁴ M̄éε ndé nn̄n̄n̄-a-mbód a bw̄ām. Mb̄íí échem mbód, échem mbód-’te éb̄íí m̄ε. ¹⁵ Melemlem n̄ē d̄óo Tit̄éé áb̄íí m̄ε, m̄ε-’ε mb̄íí m̄ó. Mb̄ōn̄s̄éné-’ε áw̄é á nl̄ó míme échem mbód. ¹⁶ Nw̄óó-’ε mbód émp̄ēé éche ées̄ē á abem-’t̄ē w̄én, nt̄ān̄ḡéné ch̄ómp̄é ap̄εen, ch̄ómp̄ē éw̄ōg

échem ehób, né-óó, abem débē ahóg, nn̄on-a-mbód-
te nhóg. ¹⁷ Titée adáó me, áyāle mbōhséné áwé
ábel níkud ádēm alongé ámbíd ámpē. ¹⁸ Modmod
eékobnéé me ádēm alongé, boḡ mbage dó ne
mm̄en. Nwóó ngíne áβε ádēm alongé, nwóó-’ε
ngíne átéd dó ámpē. Nén dóó Titée álánḡe me áá
mbel.”

¹⁹ Abén e’yale ábe Yesue bēmpēén nkabén áfintē
e bad bé Israel ámpē. ²⁰ Bó bad híin béhóbé’áá
nén bán, “Edáádəḡ é mbéb édé mó áte, apedé m̄in.
Chán nyéhēle nyéwōglān m̄ó?” ²¹ Boḡ bēmpēe
béhóbé’áá bán, “Mod awě edáádəḡ é mbéb edíí áte
eehóbéé échén ndín e mekan. Edáádəḡ é mbéb
éhēle ébēl mod awě akwedé ndím anyíen-ε?”

Bad bé Israel bébáá Yesue á yāl

²² Ngande e Nnamed ní Ndáb-e-Dyōb ékóbté’áá
á Jerusalem. Nén ábédé á pondé éche ahéb
ábáḡkē bwāmbwam. ²³ Yesue ahyómmé’áá á
abepé á Ndáb-e-Dyōb áde béchágé’áá bán Abepé
áde Solomonε. ²⁴ Bad bé Israel bēnləḡned mó,
bésēdté mó bán, “Póndé ehéé wεwε wésōḡkē sé
abane á edibelónéé-te? Nzé wε-εé edé Ane-awě-
Béwóḡté, épanléd sé áte.” ²⁵ Yesue ankwentén
áá, “Mmaá nyé aláa, boḡ nyéedúbpeé. Nsón míme
m̄beléé á d̄in áde awēm Titée, m̄en m̄bide me mbóḡ.
²⁶ Boḡ nyéedúbpeé áyāle nyéesaá échēm mbód.
²⁷ Echem mbód éwóge échēm ehób. Mbíí chó, chó-
’áá éhíde me. ²⁸ Mbage bó alongé áde déemaá’,
béewáá-’áá mbéd. Modmod eéhēlēē-sε ásoḡ bó
áwēm mekáá. ²⁹ Chōm echē awēm Titée ábáḡe me

étomé chõm esyāāl, * modmod eéhēlēē-se ásog bó á mekáá míme Titée. ³⁰ Sé Titê sêdii mod nhóg.”

³¹ Bad bé Israel béntēd meláá ámpē álúm Yesue. ³² Boŋ anláá bó aá, “Nlúmté nyé ekud é nsón mí bwâm éche ébídé ne echem Sáj. Nyéhede me meláá alúm, áwúu me. Mmê nsón ríhée nyéhedeé me meláá alúmen.” ³³ Dóó békwentanné bán, “Sééhēdēē wē meláá alúm áyāle nsón mí bwâm míme ébélé. Boŋ sélúme wē meláá áyāle esyáá Dyõb.” ³⁴ Yesue anláá bó aá, “Ngómē éténlédé áwēn Kálag e Mbéndé nén bán, Dyõb áhóbé aá, ‘Nyédii myõb.’ ³⁵ Debíi nén bán, eyale é Dyõb éekwagké. Dyõb dênychǎg bad ábe ánlõmēnnē échē eyale aá bédii myõb. ³⁶ Mē-εé Dyõb ánámté boŋ alóm-me á nkõŋsé, chán-nõ nyéhēle nyéhõbē bán, nsyáá Dyõb áyāle ítúmé ahób mēé ndii Mwǎn a Dyõb? ³⁷ Nzé meébēlē nsón míme Titée, nyéedúbpe me. ³⁸ Boŋ nzé édé nén bán mbele mó, nyédúbé míme nsón ké nyéedúbpe mmēn, ábel nén nyébíi nyésõŋten-ne ngen póg ne esyāāl nén bán, Titée adé me áte, mē-’ε mbé mó áte ngen póg ne ngen esyāāl.”

³⁹ Mmén mam míme ánhõbpē mēmbēl bēnwánén mó akób ámpē, boŋ ambíd bó á mekáá.

⁴⁰ Ambíd enê, Yesue antím ámbíd á pēd e edíb é Jodan eníní, á abwóg á hõm wēε Jone, Ndusene ádúsannáá bad, ádyēē áhed. ⁴¹ Ndun e mod epagé’áá áwē. Abê bad bēhóbé’áá bán, “Jone, Ndusene eébele’aá menyáké boŋ kéchéé

* **10:29** Chõm echē awēm Titée ábágé me étomé chõm esyāāl: donge á kálag dé’só áwóó Titée awē abagé me bó, atómé chõm esyāāl.

éche ahóbé t̄ngene anén mod édé mbále.” 42 Né-
 ɔ́, ndun e mod echě embé áhed, endúbé Yesue.

11

Kwééd eche Lazarose

¹ Mod nhóg ambé awě béchágé'áá bán Lazarose, akónlé'áá. Lazarose ne baányan bé bebaád, Maria ne Mataa bédyéé'áá á dyad á Betani. ² Anén Maria awě mwānyan Lazarose akónlé'áá, mō anwógéd Yesue dyǒg dé elod é bwām á mekuu, boŋ apínnéd échē esid. ³ Né-ɔ́, Maria bó Mataa bó bēnlōm nsəl wée Yesue bán, “A-Sán, awoŋ nsón a nlém akonle'.” ⁴ Ade Yesue áwógé mímén nlébtéd anhób áá, “Mmén nkole méesógké ne kwééd. Nén ábénlédé ábe Dyōb ehúmé, ábel boŋ Mwān a Dyōb ákud edúbé.” ⁵ Yesue andǎŋ Mataa, Maria ne Lazarose. ⁶ Ké nê, áde áwógé bán, Lazarose akonle andíi ambé wée ámbēē e'pun é'be. ⁷ Héé álānggéé ábē bembapēē áá, “Détim ámbíd á Judeya.” ⁸ Dóo ábe bembapēē bēlānggéé mó bán “A-meléed, kíné saá áwed dóo bad béhédé'áá wē meláá awúen súútǎŋ'ε?” ⁹ Yesue ankwentén bó áá, “Eesaá mbále bán mūte níwóó dyōm á háwa ne ébe-yε? Bad ábe békag mūte béekwagké áyāle bédé ne ane awě adé e'nyínen bé ekíde bé nkōŋsé. ¹⁰ Boŋ nzé békag nkuu, dóo békwagké áyāle e'nyínen bé ekíde béesaá.” ¹¹ Ade Yesue amáá ahób nén ambád ámpē áá, “Awed nsón Lazarose akúne, boŋ nkag mó anyem ásē.” ¹² Abē bembapēē bēnlāá mó bán, “A-Sán, nzé akúne né ádyéé bwām.” ¹³ Yesue ahóbé'áá nén áyāle ambíi áá, Lazarose awédé, boŋ ábē bembapēē bēnwēmtēn bán, ahóbe áá, akúne kúnén. ¹⁴ Né-ɔ́, Yesue ampanléd bó áte áá,

“Lazarose awédé, ¹⁵ bon á yǎl echên, ndé menyinge nén meé meebédéé áhed ábel bon nyédúbe. Syánē dékag-kóó áwed bɔɔb.” ¹⁶ Hê dóo Tomase (awě bēnchuu’é bán, Nhéd) álângeé baáb bembapεε aá, “Syánē ámpē dékag áwed ábel bon nzé kwééd chó edé déwê ne Meléede.”

Yesue mó adé mpuu ne alongé

¹⁷ Bɔɔb-póó, áde Yesue ápédé á Betani, antán née bémáá Lazarose alíme. Ene pónde né nímê ndim ríkébē á son-tê e’pun é’niin. ¹⁸ Bootya á Betani ápe á Jerusalem ábédé dyam máyl mébe. ¹⁹ Ekuđ é bad bé Israel ênhyě wée Mataa bó Maria áwenned bó áyāle kwééd eche awab mwǎnyaŋ. ²⁰ Ade Mataa áwógé bán, Yesue ahúε’, ankě mó abomen á nzii, bon Maria anlyǎg á ndáb. ²¹ Dóo Mataa álângeé Yesue aá, “A-Sáj, nzé wembé hén né mwǎnned eewédeé. ²² Bon ké nê, mbíi meé ké bɔɔb kéchéé éche ésédté Dyöb, Dyöb débě wε.” ²³ Yesue anláá mó aá, “Mwǎnyaŋ ábē á alongé ámpē.” ²⁴ Mataa antimtén mó aá, “Mbíi meé ápuú á pónde e mpuu mbwε mé asóg.” ²⁵ Dóo Yesue alánge mó aá, “Me-éé ndé mpuu né alongé. Nzé mod adúbpé me, ké anwé, ábē abé á alongé. ²⁶ Kénzéeé awě adé á alongé bon adúbé-’ε me, éewáá mbêd. Edúbpé né-yε?” ²⁷ Hée Mataa ákwentanné aá, “Eε, A-Sáj, ndúbpé meé wε-εé edé Ane-awě-Béwógté, Mwǎn a Dyöb awě Dyöb áhóbé aá, ápē á nköhsé.”

Yesue achii

²⁸ Ade Mataa áhóbé nê, antím ámbíd, ákē áchag mwǎnyaŋ Maria kun, aláá mó aá, “Meléede adé hén, asεdte-’ε wε.” ²⁹ Ade Maria áwógé nê, anhidé ásē mehélé, áke atán Yesue. ³⁰ Bɔɔb-póó, Yesue

enkêmpaá asól á dyad-tê, andíi ambé wée Mataa ántännē mó. ³¹ Ade bad bé Israel ábe bébedé á ndáb-te ne Maria âwenned mó, bényíné née ábídé á ndáb-te ne mehélé, anyagte á soḡ, bēnwēmtēn bān, akag achii. Né-ṓ, bēnhīd mó.

³² Ade Maria ápedé wée Yesue ámbēē boḡ anyín mó, ankwě mó á mekuu, ahób aá, “A-Sáḡ, nzé wembé hén, né mwānned eewédéé.” ³³ Anyín áde Yesue ányíné née Maria áchyeé’é, anyín-ne née bad ábe bēnhīd mó béchyeé’é, ngol enkonned mó, átāg-ke áte á nlém-tê bwāmbwam. ³⁴ Ansédéd aáken, “Héé nyélímmé mó?” Bēnkwēntēn bān, “A-Sáḡ, hyě ényín.” ³⁵ Yesue anchíí. ³⁶ Héé bad bé Israel bēhóbéé bān, “Nédē ankōḡ mó adəḡ-óó!” ³⁷ Boḡ bó donḡe á bad bēnhōb bān, “Ngómē ambēl mod awě ankwē ndím ányinne. Eéhele’aá-se ábel Lazarose eewág-ε?”

Yesue apuúdté Lazarose

³⁸ Ngol enkonned Yesue á nlém ámpē. Né-ṓ, ankě á soḡ. Ene soḡ ebédéé soḡ echě bēpwógé aláá áte, boḡ békútēn chó nsəl ne aláá. ³⁹ Héé Yesue álāḡgéé ábē bad aá, “Nyéhūd ádé aláá.” Dóṓ Mataa, mod awě awédé mwānyāḡ áhóbéé aá, “A-Sáḡ, ndim mémād abooted dé achum bəṓb áyāle ríkídembé á soḡ-tê bəṓb e’pun é’niin.” ⁴⁰ Dóṓ Yesue álāḡgéé mó aá “Meelāḡgéé wε meé nzé edúbpé né wěnyín Ngum e Dyōb-ε?” ⁴¹ Né-ṓ, ábē bad bēnhūd ádé aláá á nsəl ní soḡ. Dóṓ Yesue ánóné ámīn boḡ áhōbē aá, “A-Tê, nságnéné wε áyāle éwógé me mekáne. ⁴² Mbíí meé eyōgké me mekáne awóg, boḡ nhóbe nén ábel boḡ ábén bad ábe bédé hén bédúbe bān, wε-éé elómé me.” ⁴³ Ade ámáá ahób nê dóṓ

áchágté ehób ámin boŋ áchēnlē Lazarosē aá, “A-Lazaros, bíd áwed!” ⁴⁴ Ane mod awě ammad awé abíd-te áwed. Mbóm éche bēnkaánné mós mekuu ne mekáá ne tumbe echě bēnkaánné mós e’só, émbē ébē mós á yǎl. Yesuē anláá bós aá, “Nyéhune mós ábē bwēm á yǎl, ákag.”

Béhagke Yesuē

(Mat 26.1-5; Mak 14.1-2; Luk 22.1-2)

⁴⁵ Bad bé Israel ábe bēnkě Maria á mewenned bényin mekan nime Yesuē ámbēnlé, bēndūbē-ē Yesuē. ⁴⁶ Boŋ bós doŋge á bad bēnkě Befarisia atán, bēláá bós mam nime Yesuē ábélé. ⁴⁷ Hée beprise bēmbáá ne Befarisia bēchénlé mbom ní káánsel. Bēnhōb bán, “Cheé débēnlé bōob? Detəŋgéné dyam abel áyāle anén mod abele menyáké bwāmbwam! ⁴⁸ Nzé detědté bán, ákēne nímén mekan á’sō né moosyāál ádūbē mós. Nzé moosyāál adūbpé-ē mós, né bad bé Roma bépě, békōbēn-ne syánē eched Ndáb-e-Dyōb, békōbēn-ne syánē ádēd alon.” ⁴⁹ Dós mod nhóg átíntē echáb awě bēchágé’áá bán Kaifasē, awě abédé prise ambáámbáa nímē mwě, áhóbéé aá, “Nyéebíí’é dyamdyam. ⁵⁰ Nyéenyínéé nén bán ébós bán, mod nhóg áwē á nló ní moosyāál tómaa alon ásyāál ábós?” ⁵¹ Kénéé áhóbé’áá nē, saké nímē mewēmtēn mēn mós áhóbné’áá nē. Ngáne abédé prise ambáámbáa nímē mwě, áhóbé’áá dyam áde débēnléd, á’sō é’ pónde, aá Yesuē áwē á nló ní bad bé Israel. ⁵² Saá-kaá á nló ní bad bé Israel bēnpēn, boŋ kəŋne álad bad bé Dyōb bésyāāl ábe bémáá ahented áte hōm ahóg, ábel bēbē mod nhóg.

⁵³ Bootya échē epun bad bēmbáá bé Israel bēmbootéd Yesuē ahəge, áwúu mós. ⁵⁴ Nén dēmběl

Yesue eebíde'aá á nhéné ámpē átíntê e bad bé Israel. Bóobe ábē bambapēē bēnhidé békē á dyad áde béchəgēé bán Efrem, bédyēē-’e áwed. Adê dyad ábédé bēnbēn ne ehyánge. ⁵⁵ Póndé e ngande e Nnyíme-ámīn embé bēnbēn. Né-ɔ́, bad híin bémbíđ myad ne myad, békē á akuu á Jerusalem áwobe échab yəl ngáne mbéndé e Mosēē éhédé’áá, ábonṣen ngande e Nnyíme-ámīn. ⁵⁶ Abē bad bé Israel bém̄bē bēhédé Yesue. Ade béládné á Ndáb-e-Dyöb bésédte’áá, nhóg ne aníní bánken, “Chán nyéwémtné, nyédúbpé bán, áhye ngande-ye?” ⁵⁷ Bepriṣe bém̄báá ne Befarisia béntōmēd ehəngé bán, kénzée awē anyíne Yesue áhye áláa bó, ábel bon békōb mó.

12

Béwógté Yesue á Betani (Mat 26.6-13; Mak 14.3-9)

¹ Ade ngande e Nnyíme-ámīn élyágé e’pun ntóob, Yesue ankē á Betani wée Lazarose awē ámpuúdté ádyéé’áá. ² Bém̄belé Yesue ndyééd áhed. Mataa mó antómēd ene ndyééd. Lazarose ambé nhóg átíntê e bad ábe bóobe Yesue bēbédé á tébele ádyé ndyééd. ³ Héē Maria átédé epom é dyög dé elod á bwām áde álélé nkun bwāmbwam. Adê dyög bēbénlé dó nād.* Anwógéd Yesue á mekuu, apíné-’e mó mekuu ne échē esid é nló. Elod é bwām énlōg ndáb áte esyáál. ⁴ Dóo Judas Iskariode, mbapēē nhóg awē émbēē bán mó ášōm Yesue áhóbeé áá, ⁵ “Cheé bénkēnsómmé ádén dyög, bétéd mímén mənέ békē bēbē betóótōkē bé bad?

* **12:3** Nād: Nād edii mbonja echē ewóo elod é bwām eche bēbēnléé mōg mé elod é bwām.

Béhélé'áá-sε bésóm adê dyǒg dyam-έε áde nsábe ní mwě nhóg.” ⁶ Judase anhób nê, saké áyāle abédé betóótōkē bé bad ngol, boη áyāle abédέε nchíb. Ngáne ábédé mod awě awánládtáá bóbōo ekwε é mōné, ayǒgkē'áá mōné atéd ámbíd. ⁷ Boη Yesuε anhób áá, “Tεδé mós, ákoo áde ályágé ásē ábel boη ábenled dós mbwε míme bέlimēē mε. ⁸ Betóótōkē bé bad bédé ne nyé póndé téé boη mε pen méebáá ne nyé póndé ésyāāl.”

Béhǒgke Lazarose

⁹ Ene póndé-óó, bad bé Israel hiin bēnwōg bán, Yesuε adé á Betani. Né-óó, bēnkě áwed. Saké Yesuε mwēmpen mós ankǒη boη békē áwed, boη bēnkě Lazarose anyín awě Yesuε ámpuúdté. ¹⁰ Né-óó, Bεprise bémbáá béhǒgkē'áá kóǒηne Lazarose áwúu mós, ¹¹ áyāle bad bé Israel bétédté'áá bós, bédūbpē Yesuε. Béndūbē Yesuε áyāle dyam áde dēmbenléd ne Lazarose.

Yesuε asólé á Jerusalem née kǒη

(Mat 21.1-11; Mak 11.1-11; Luk 19.28-40)

¹² Née bīn é'sǎngé, ndun e mod echě enhyě á Ngande e Nnyíme-ámīn bēnwōg bán Yesuε apag á Jerusalem. ¹³ Hê dós bésélé e'kikag é' mii boη békǎg mós abomen á nzii. Béhágé'áá e'saad bán, “Hosána! Nnam mbê ne ane awě apedé á dīn áde Sǎngwéé. Nnam mbê ne kǒη e bad bé Israel!”

¹⁴ Yesuε ankūd etum é ésel, ádīi-'ε chós. Nén dēmbenléd ngáne éténlédé á kálag e Dyōb nén bán,

¹⁵ “A-bad bé Zayōn, nyéebáá', nyénōne' echēn kǒη ehúé', edíídé-'ε etum é ésel.”

16 A pónde echë nímén mekan mébénlédé, be-
mbapεε ábe Yesuε bénkênsóηténne. Bon áde
Yesuε âmpuú'ε ne ehúmé é Dyöb, dóo bënchemmé
bán mam míme mébénlédé t̂ηγεne Yesuε móo
mêntenléd, á yǎl eché.

17 Ndun e mod echë embé ne Yesuε áde áchénlé
Lazar̄σε á son-tê bon ápuudté mó, embé ékalé'
mímê nkalan. 18 Né-óó ndun e mod enkë Yesuε
abomen áyāle ábén e'chemléd bé menyáké ábe
âmbenlé. 19 Héε Befarisia bélângeé nhóg ne aníní
bán, “Nyénone! K̄ηne b̄ob deéhéléé dyamdyam
abel. Nk̄õsé r̄syā̄l r̄híde mó.”

Bad bé Grikia béhede Yesuε

20 Donje á bad bé Grikia bémbē áfintē e bad ábe
bênkē ngande e Nnyíme-ám̄in á Jerusalem, áke dé
abe Dyöb edúbé. 21 Bēmp̄ε w̄εε Filibe. Filibe awē
ambíd á dyad á Betsaida á mbwóg e Galilia. Bénlāā
mó bán, “A-Sán, sēd̄áó Yesuε anyín.” 22 Filibe
ankë Andreya aláa. Dóo bó bad bébe békíí Yesuε
aláa. 23 Yesuε ankwentén bó aá, “Pónde epedé echë
ehúmé e Mwān-a-Moonyon énnynēdtē. 24 Ne
mbále, nlânge nyé nén mēé, mbum e ngun póg edii
mbum e ngun póg, k̄áōη né bēwéné ch̄ó á nd̄ob-
tē bon ewé. Ewág-káa, bon echyáá mbum é ngun
émp̄ee éche ébúú áte. 25 Mod awē ad̄áó adē alongé,
āb̄ōd dó. Mod awē mó-'ε ak̄óó adē alongé, á nk̄õsē-
te w̄én, āk̄áó dó á alongé áde déemaá'. 26 Kénz̄éé
awē abenle me, at̄āngéné awēm mb̄aledε abé. Ké
hée-'ε w̄εε r̄díí, awēm mb̄aledε at̄āngéné abé áhed.
Echem Sán āb̄ε-'ε kénz̄éé awē abenle me edúbé.

Yesuε ahóbé t̂ηγεne eche kwééd

27 “Bɔɔb-pɔɔ, nlém rítage me áte. Chee-ɔ méhɔbpē? Nhɔb meé, ‘A-Tê, weémwāg-se metake míme méhúe’ métán me-ye?’ Aáy, méehɔbpé nê, áyāle enén pónde e metake chɔ ekáɔ boŋ nípag wén. 28 A-Tê, lúméd echɔŋ ngum.” Héε ehɔb ébidéé á Dyɔb nén bán, “Nlúmté echêm ngum, mǎlúméd-te chɔ ámpē.” 29 Ene ndun e mod echě embé áhed enwóg éché ehɔb. Bénhɔb bán dyɔb dɔɔ ákúme áte. Bad bémpēe bénhɔb bán, ángel chɔ ehɔbé áwē. 30 Yesue anláá bó aá, “Áyāle echên dɔɔ échén ehɔb ébidé, saké áyāl echêm. 31 Pónde epedé echě Dyɔb dékǎádté mímén nkɔŋsé. Nkamlɛn míme nkamlɛne á nkɔŋsé mékwě bɔɔb. 32 Boŋ áde bémadté me anyen ámín, mǎdɔl bad bésyāál áwēm.” 33 (Yesue anhɔb nê álúmed ndín e kwééd echě áwē.) 34 Ndun e mod echě embé áhed enkwɛntén mó bán, “Séwógé á mbéndé-te bán Ane-awě-Béwǔgté ábē á ngíndé ne á ngíndé. Chán-nɔ éhɔbéé wéé ‘Bétǎŋgéné bényēn Mwǎn-a-Moonyoŋ ámín.’ Nzéé adé anén ‘Mwǎn-a-Moonyoŋ?’ ” 35 Dɔɔ Yesue álǎŋgéé bó aá, “E’nyínen bé ekíde bébē ne nyé á esɔŋ e pónde ngên. Nyékag bɔɔb áde e’nyínen bé ekíde é’díi é’díi, ábel boŋ ehíntén éékɔbē nyé. Mod awě akag á ehíntén-té eebyé’é wéε ákagké. 36 Nyédúbe e’nyínen bé ekíde bɔɔb áde é’díi ne nyé, ábel nén nyébê bán bé e’nyínen bé ekíde.”

Bad bé Israel béedii béedúbpéé Yesue

Ade Yesue amáá mímén mekan mésyāál ahɔb, antedé bó, áke ásɔm wéε béenyínné mó. 37 Kénéε ene ndun e mod énnýínnē ábén e’chemléd bé menyáké é’syāál ábe Yesue ámbenlé, bénkëndúbéé

mó. ³⁸ Nén dēmbēnléd âlóned e'yale ábe nkal é'daðǎŋ Yesayaa ánhōbpē aá,

“A-Sán, nzéé adúbpé eyale éche sékálé, nzé-módé akidényin ngum echōŋ áchēm-me chó?”

³⁹ Né-ǎó, béehēle'aá-se bédúbe. Yesayaa ahóbé hōm démpēe aá,

⁴⁰ “Dyōb ákwidé bó ndím, ábē-’ε bó nlém mé aláá, ábel nén nímab mīd méēnyinnē’,

béēsóŋtanne.

Nzé bēbélé-’ε nê, né bétimén me, né mēchoód-te bó.”

⁴¹ Yesayaa anhób nén áyāle annyin ehúmé éche Yesue, anhób-pe áyāl echê. ⁴² Ké nê, bad hiin béndūbē Yesue, káŋne donge á bad bémháá. Bon

ngáne bēháá’áá Befarisia, bēnkēnlúmédte yāl, ábán nén bán béēbídte bó á ndáb é mekáne.

⁴³ Bēbélé’áá nê áyāle bēndǎŋ mekenag mé baányon tómaa mé Dyōb.

E'yale ábe Yesue békāād bad

⁴⁴ Héε Yesue áchǎgté ehób ámin áhōbē aá, “Kéznzéé awē adúbpé me, eedúbpēé mmēmpen,

adúbpé káŋne ane awē alómé me. ⁴⁵ Kéznzéé-’ε awē anyiné me, anyiné ane awē alómé me. ⁴⁶ Mpedé

á nkōŋsé néε e’nyinen bé ekide, ábel bon kéznzéé awē adúbpé me, eélyāgē á ehintén-tē. ⁴⁷ Kéznzéé

awē awógé ábēm e’yale, bon eékonge bó, saké me nkáadte mó. Meekáádtéé mó áyāle meépedéé

ákaad nkōŋsé bon mpedé áson bad bé nkōŋsé. ⁴⁸ Kéznzéé awē abáá me á yāl bon eékobe-’ε ábēm

e’yale, awóó mod awē ákāād mó. Ábēm e’yale bēn bóó békāād mó á mbwe mé asóg. ⁴⁹ Ebê nê, áyāle meehóbēé nímén mésyāāl ne echēm kunze.

Bon Titée awē alómé me, álánge me chōm éche

ńítą̀ńgéné ahób. ⁵⁰ Mbíi meé kéchéé éché álą̀ńgé me aá ńh̄h̄b épeene alonđe áde déemaá'. Né-ɔ́, kéchéé éche ńh̄h̄bée, ńh̄h̄be' ch́ ńgáne Titée álą̀ńgé me."

13

Yesue awōbpé ábē bembapεε mekuu

¹ Epun é ngande e Nnyíme-ámín éńlyǒg ńéé chǎn. Yesue ambíi aá eche pónđe emaá ape eché mótą̀ńgéné nk̄h̄sé atede, áke wée eche Sń. Andǎh bad bé nk̄h̄sé ábe béndúbē ḿ, alúméd-te éché edǎhge káǎhne á asóg.

² Yesue ne ábē bembapεε bedyágé'áá ndyééd ngukél, Satan-ε ammǎd Judas Iskariode mwǎn awě Simone mewěmten mé mbéb ásóled áte ásóm Yesue. ³ Yesue ambíi aá eche Sń abagé mekan mésyā́l áwe mekáá. Ambíi-ε aá ḿhūū wée Dyōb mótíme-ε ambíd wée Dyōb. ⁴ Ade bedyágkē ndyééd nê, Yesue anhidé ásē, ahúd nkob á yǎl, atád tábele á nkog. ⁵ Héé áhédé mendíb á kúmbe-tê, bon ábootéd ábē bembapεε mekuu awobe, ápinnǎd tábele awě ánwā́'é á nkog. ⁶ Ade ápédé wée Simon Petro d́ Simone ásedtée ḿ aá, "A-Sń, ehede me mekuu awobe-ye?" ⁷ Yesue ankwentén ḿ aá, "Weéhēlē-se esǎhtén dyam áde ńbeleré bǎb, bon ámbíd e ńímén mésyā́l d́ wésǎhtēnnē." ⁸ Héé Petro áhóbée aá, "Aáy, weéwōbpée me mekuu mbéd." Yesue antimtén ḿ aá, "Nzé meéwobpe we mekuu né wéewónđe dyamdyam abelen ne me." ⁹ Simon Petro anláá ḿ aá, "A-Sń, né saké mekuu mēmpen-éé wéwobée me. Wéwobé me káǎhne mekáá ne nló!" ¹⁰ Yesue ankwentén aá, "Mod awě amaá mendíb awǎg, yǎl esyā́l emaá

mó asán, eetânγενεέ mendíb awóg ámpē, étōmēé áwobe mekuu.* Nyêmaá asán, boŋ saké nyé moosyáál nyêsaá.” ¹¹ Yesue ammăd abii mod awě äsōm mó. Néε dēnkǎŋ boŋ ahób aá saké moosyáál asáá.

¹² Ade áamáá bó mekuu awobe, anhé nímē nkob á yǎl, átīm ámbíd áwē e'dii. Héε ásedteé bó aáken, “Nyêsóŋténé dyam áde míbénlé nyé-yε? ¹³ Nyêchæge με Meléede, nyêchæge-’ε με Sáŋgwéé. Nyétânghéné, áyāle nê dēn dōó rídíi. ¹⁴ Né-óó, nzé με awě ndé nyé Sáŋgwéé mbé-’ε nyé Meléede nwöbpé nyé mekuu, né nyémpē nyétânghéné nhóg ne aníníi mekuu awobe. ¹⁵ Nlúmté nyé eláŋsén éche nyétânghéné ahíd ábel nén nyémpē nyébel ngáne míbénlé nyé. ¹⁶ Ne mbále nlânge nyé nén meé, mbaledε eetóméé eche sán, mod awě bélómé-’ε eetóméé mod awě alómé mó. ¹⁷ Bōob áde nyébíi nímén mam, nnam mébē ne nyé nzé nyébele mó.

¹⁸ “Meehóbéé nyé moosyáál. Mbíi bad ábe n̄pwédé. Boŋ e’yale ábe é’ténlédé á Kálag e Dyöb é’tânghéné alón. Eténlédé nén bán, ‘Mod awě súmō sēdyâg ndyéed akūnnéné με yǎl.’ ¹⁹ Nlânge nyé nén bōob, áde éēbēnlēdēē ábel nén nzé ébēnlédé, nyédúbe nén bán, ‘Ndíi mó Awě Ndíi.’ ²⁰ Ne mbále, nlânge nyé nén meé, kénzéeé awě akobé mod awě n̄lómé, akobé με. Kénzéeé-’ε awě akobé με né akobé ane awě alómé με.”

*Yesue ahóbé á’sō é’ pōndé aá bēsōm mó
(Mat 26.20-25; Mak 14.17-21; Luk 22.21-23)*

²¹ Ade Yesue áamáá nímén mekan ahób ndutul enlóg mó á nlém-tē, ápanléd-te ábē bembapeε áte

* **13:10** Donje á kálag dé’só déewóó’é éetóméé áwobe mekuu.

aá, “Ne mbále, nlânge nyé nén meé, nyé mod nhóg äbë me á mekáá mé bad bé ekoyí.” ²² Héé äbë bembapεε Bénónné á mesó, áyāle Bénkēmbíí’é mod awë áhóbεé. ²³ Mbapεε nhóg, awë Yesuε ändāngé, andyë mó á akéb. ²⁴ Dóo Simōn Petro ápebtanné ane mbapεε mīd, áhōbē aá, “Sedéd mó mod awë áhóbεé.” ²⁵ Dóo ane mbapεε ásídté Yesuε á yǎl-tē, ásedté mó aáken, “A-Sán, nzéé éhóbεé?” ²⁶ Yesuε ankwentén mó aá, “Mod awë métōdéé ewele á díse-tē boŋ níbe mó, mó adé ane mod.” Héé átédé ewele, átōdté á díse-tē, ábagé Judase, mwān awë Simōn Iskariōde. ²⁷ Akob áde Judase ákóbé échē ewele, Satane ansól mó áte. Dóo Yesuε álāngéé mó aá, “Dyam áde éhedéé Abel bël dó á mehélé-te.” ²⁸ Boŋ mod ké nhóg awë bóbōo bédyágé’áá ndyééd enkēnsōŋtēnné chōm-éé ékáá boŋ Yesuε aláá Judase nē. ²⁹ Ngáne édíí bán Judase mō akōŋgé’áá ekwe é māné, donge á bembapεε Bénwēmtēn bán Yesuε álāngé mó aá áke áchan bwēm ábe bébenlédté á ngande, ké’ε chōm éche bébεé betóótōkē bé bad. ³⁰ Ade Judase ákóbé ewele éche Yesuε ábágé mó kobén, ambíd ebwōg. Ehíntén ênkwe.

Yesuε abagé mbéndé e ekóólé

³¹ Ade Judase ámáá abíd dóo Yesuε áhóbεé aá, “Bōob-pōó ehúmé e Mwān-a-Moonyon ényínnédé. Ehúmé é Dyōb-pe ámpē ényínnēd mbwiined ne mwān. ³² Nzé Dyōb ákúdé ehúmé ámbíd e Mwān, né Dyōb dēn ámpē débël ehúmé é Mwān ényínned. Abël-le nē ábwōg-ábwōg. ³³ A-baányan, echem pōndé ábé ne nyé, edé esōŋ. Nyéēhēd me, boŋ ngáne ménlāā’é bad bé Israel, melelem nē

dóo rílanḡeé nyé bɔɔb, mɛé, ‘Wée ríkagké, nyéehenlé aɛ áhed.’ ³⁴ Mbage nyé mbéndé ekóólé bɔɔb, nén nyédəḡ nhóg ne aníníí. Ngáne rídáá nyé, nyémpé nyédəḡ nhóg ne aníníí. ³⁵ Nzé nyédəá nhóg ne aníníí, né mod tée ábīi aá nyédíi ábêm bembapɛɛ.”

*Yesue ahábé ngáne Petro dbāḡgē mó á yǎl
(Mat 26.31-35; Mak 14.27-31; Luk 22.31-34)*

³⁶ Simɔn Petro ansɛdéd Yesue aáken, “A-Sáḡ, héé éhɛdɛé akɛ?” Yesue antimtén mó aá, “Weéhēlē-sɛ ehíd mɛ bɔɔb wée ríkagké, boḡ ámbíd e pónde wēhíd mɛ.” ³⁷ Petro ansɛdéd mó aá, “A-Sáḡ, cheé ékás boḡ meéhēlē se nhíd wɛ bɔɔb? Mbɔḡsɛné áwé á nló rímóḡ.” ³⁸ Héé Yesue ákwɛntanné mó aá, “Ekoó aboḡsɛn dé awé á nló rímêm-ɛ? Ne mbále, nlāḡge wɛ mɛé, nchóm-a-kúb adêhób aá mótɔo’, wēbāḡ mɛ á yǎl ngen éláán.”

14

*Yesue mó adé Nzii e mbále
echē epɛɛne alongé*

¹ Dóo Yesue ábádeé ábē bembapɛɛ aláa aá, “Nyéetagté nlém á abum. Nyésum nlém wée Dyɔb, nyésum-mɛ kááḡne áwêm. ² Toḡ ébuú áte á ndáb echē echem Sáḡ. Nkag-kɛ áwed áboḡsɛn nyé hǔm. Nzé énkêmbé nê, né menkênláá’é nyé mɛé nkag nyé hǔm aboḡsɛn. ³ Nzé nkií-’ɛ nyé hǔm aboḡsɛn, mētīm ámbíd, ríhyɛ ntéd nyé ábé ne mɛ, ábɛl nyémpé nyébê hǔm áde rídíí. ⁴ Nyébíí nzii echē etime’ wée ríkagké.” ⁵ Héé Tɔmase álāḡgeé mó aá, “A-Sáḡ, séebíí’é wée ékagké. Chán-nō sébwéé nzii abíi echē etime áwed?” ⁶ Yesue ankwɛntén mó aá, “Mée ndé nzii eché ekag wée echem Sáḡ,

mbále ehúe' ne me, me-'aá mbage alongé. Mod-mod eehēlē-se ápe wée echem Sáj, ésebán abwedé áwēm.”⁷ Héε Yesue álângeé ábē bembapee aá, “Bɔɔb áde nyébíí me, nyēēbīī kááŋne echem Sáj.* Bootya bɔɔb nyēnyíne mɔ, nyēbíí-'ε mɔ.”

⁸ Filibe anláá mɔ aá, “A-Sáj, lúméd-te sé Titée. Chõm ésyāēl éche séhedéé éetóméé nē.”⁹ Yesue ankwentén aá, “A-Filib, nkémbē ne nyé á etùn é pón dé, chán-nō éhéleé-se ehób wée mōbíí'ε me? Kénzée awē anyíne me né anyíne Titée. Chán-nō éhéleé-se ehób wée ‘Lúméd sé Titée?’¹⁰ Weedúbpeé wée echem Sáj adíí me áte, me-'ε mbé mɔ áte-ye?” Héε Yesue álângeé ábē bembapee aá, “Mam míme nlangeé nyé méebídeé áwēm dēn. Bon echem Sáj awē adé me áte mō abele nímē nsón.¹¹ Nyédúbe me ngáne n̄hóbé meé echem Sáj adíí me áte, me-'ε mbé mɔ áte. Nzé nyéedúbpe nē, nyédúbé ké áyāle mam mé menyáké míme mbelée.¹² Ne mbále, nlange nyé nēn meé, kénzée awē adúbpe me, ābēl mam nímē mbelée. Abēl-le kááŋne mekan míme métómé nímén áyāle nkag wée Titée.¹³ Mēbēl-le kéchéé éche nyésédté á dīn ádēm ābel nēn ngum echē Titée ényínned ámbíd e Mwān.¹⁴ Nzé nyésédté me kéchéé á dīn ádēm, mēbel chɔ.”

Yesue aá mōlōm Edáádāŋ éche Esáá

¹⁵ Yesue ambád ahób aá, “Nzé nyédáá me, né nyēēhíd echem mbéndé.¹⁶ Mēlāā Titée, ābē-'ε nyé Nwōŋgene ampée, awē ābē ne nyé á ngíndé ne á ngíndé.¹⁷ Ane Nwōŋgene mō adé Edáádāŋ échē

* **14:7** Bɔɔb áde nyébíí me, nyēēbīī kááŋne echem Sáj; donge á kálag dé'só áwóó nzé nyēnkōŋ me abíí, né nyēēbīī kááŋne echem Sáj.

ébidte' mbále áwed tâηgene Dyöb. Bad bé nköŋsé béehelée-se békob mó, áyāle béēnyīnēē mó, béēbīi-'aá mó. Boη nyēbīi mó áyāle adé ne nyé, ābē-'ε nyé áte.† ¹⁸ Nzé nkií, méetēdée nyé menyuu. Měťim ámbīd áwēn. ¹⁹ Mwāmpīn ní pónde, nköŋsé méenyīnné me ámpē. Boη nyépen nyēēnyīn me. Ngáne mébēē á alonǵé, nyémpē nyēēbē. ²⁰ Nzé échē epun épédé, nyēēbīi bán ndé echem Sāη áte, nyé-'ε nyēbé me áte, melemlem ngáne me-'ε nídíi nyé áte. ²¹ Kénzée awē akobé echem mbéndé, áhīdē-'ε chó, mō adé mod awē adāá me. Kénzée awē adāá-'ε me, echem Sāη mó-'ε ādāη mó. Mémpē mēdāη mó nlúméd-te mó yāl." ²² Dóo Judase (saké Judas Iskariōde) áhóbéé aá, "Boη A-Sāη, chán wélūmēdtē sé yāl boη weelúmté nköŋsé pen?" ²³ Yesue ankwentén aá, "Nzé mod adāá me, áhīd ábēm e'yale. Echem Sāη ādāη mó, sé echem Sāη-'ε séēpē áwē, sédyēē-'ε ne mó. ²⁴ Nzé mod eédāā me, eehídée ádēm ayáge. Adén ayáge áde nyéwógé déesaá ádēm. Adii áde Titée awē alómé me.

²⁵ "Nlǵgé nyé nímén mésyāāl áde nídíi ndé ne nyé. ²⁶ Nwōηgene, Edāādāη éche Esáá awē Titée álōmmē á dīn ádēm, áyāǵēd nyé mekan mésyāāl ābēl-le nyékamtán mekan mésyāāl níme nílǵgé nyé. ²⁷ Nsaη móo nílyáǵnéde nyé. Mmēm nsaη móo níbagéé nyé. Meébāǵēē nyé mó ngáne nköŋsé níbagéé. Nyéētagté nlém á abum, nyéewógé mbwóg. ²⁸ Nyēnwóg néē níhóbé meé 'Mětēde nyé boη mēťim ámbīd áwēn.' Nzé nyēndāη me né nyēēwóg menyīηge bán nkag wēē Titée áyāle Titée atómé me. ²⁹ Nlǵgé nyé nén bōōb

† 14:17 Abē-'ε nyé áte; donje á kálag dé'só áwóó adé-'ε nyé áte.

áde éēbēnlēdēē, âbel nēn nzé ébēnlédé, nyédúbe.
³⁰ Syánē déebudté póndé awónj ákal ámpē, áyāle nkamlēne a nkōjsé ahúe'. Eewóó'ē ngíne ké póg ámīn echēm. ³¹ Bonj kénē mēchennéd mós yāl mbēl ngáne echem Sáj ahóbé aá mbel, âbel bonj nkōjsé mbīi nēn bán, ndáá echem Sáj. Né-'aá ákээ bonj mbelé kéchéé éche ahóbé aá mbel.

“Nyéhyag syánē déhide hén.

15

Yesue mâ akoó alín dé epum á bwel abé

¹ “Mē-éé ndé alín dé epum é bwel, alín dé epum é bwel dēn dēn. Echēm Sáj-'e abé mbelē-nzag.
² Ahúde' ngen ké ehéé echē edé mē á yāl, echē eechyáá' e'pum, ápagké-'e ké ehéé echē echyáá' e'pum, âbel bonj ébonj yāl ébude-'e achyáa. ³ Ayáge áde ní'yágté nyé ábélé nyēmaá asáj. ⁴ Nyélyāg nyébē ne mē, mémpē mēlyāg mbé ne nyé. Ngen chēn eéhēlē-se echyáá e'pum áde éesaá á alín á bwel. Melemlem néē nyémpē nyéehēlé-se nyéchyáá e'pum ésebán nyédé ne mē.

⁵ “Mē-éé ndé alín dé epum é bwel, nyé-'e nyébē ngen. Nzé mod adíí adé ne mē bonj mē-'e ndé ne mós áchyāā e'pum bwāmbwam. Nyéehēlē-se nyébēl dyamdyam ésebé ne mē. ⁶ Nzé mod eésē ne mē, bēhūd mós néē ngen. Ene ngen ebelé ekintéd. Bēladéé échē ndín é ngen áte, bēbwém chó á muú-te, éhyāj-'e. ⁷ Nzé nyédíi nyédé ne mē, bonj ádēm ayáge-'e ádíí adé nyé áte, kéchéé éche nyésédté, nyéēkūd. ⁸ Edúbé éche echēm Sáj ényínnad nzé nyēbudé e'pum achyáa, nē-'aá débēl nyébē ábēm bembapē. ⁹ Ngáne echēm

Sáŋ ádáá me, melemlem née mémpē rídáá nyé. Né-ó nyédii nyébê ne me âbel boŋ ríbbê rídəŋ nyé. ¹⁰ Nzé nyéhídé échəm mbéndé, né məbē rídəŋ nyé. Melemlem nê dáo ríhídéé mbéndé échē echem Sáŋ, adii adəá-’ε me. ¹¹ Nlānge nyé rímēn mésyāāl âbel nēn nyémpē nyéwôg nyaa e menyiŋge echē ríwogéé, rímēn menyiŋge mélôn-ne mbon. ¹² Echem mbéndé edii nēn, nyédəŋ nhóg ne aníní melemlem nēŋgáne rídáá nyé. ¹³ Nzé mod awédé á nló mí baáb, né alúmté edəŋge éche étómténé achab ámīn. ¹⁴ Nzé nyébele’ mekan ríme rílánge nyé meé nyébel né nyédii ábēm besón. ¹⁵ Meéchāgēē nyé bembəledε ámpē, áyāle bembəledε béēbyē’έ mam ríme echab sáŋ ábeléé. Boŋ ríchəgέé nyé meé ábēm besón áyāle nlánge nyé mam mésyāāl ríme echem Sáŋ álánge me. ¹⁶ Nyéəpwedéé me, boŋ me-εé mpwedé nyé, nlóm-me nyé âbel mekan ríme méchyáa e’pum e’ bwām. Nyaa é mekan échē ébē abé ne abé. Nzé nyébelé-’ε nē, echem Sáŋ äbē nyé kéchéé éche nyésédté á dīn ádēm. ¹⁷ Mmēn mam mésyāāl ríme rílanŋgeé nyé-ó, médii nēn meé, nyédəŋ nhóg ne aníní.”

Bad bé nkōŋsé békóó nyé

¹⁸ Yesuε ambád ábē bembapεε aláa aá, “Nzé nkōŋsé ríkóó nyé, nyébii nēn bán meé bésébpé akóó. ¹⁹ Nzé nyēmbé nēŋgáne bad bé nkōŋsé, né nkōŋsé métəd nyé nēŋgáne ábē bad. Boŋ mpwedé nyé áfínté e bad bé nkōŋsé. Nyéēsaá bad bé nkōŋsé. Né-’aá ákáá boŋ nkōŋsé ríkóó nyé. ²⁰ Nyéwēmtεn ehób éche ménlāā’έ nyé meé ‘Mbəledε eetóméé eche sáŋ.’ Nzé bēmbané me á metake-tē né bēbané nyémpē á metake-tē. Nzé bēnhíd ádēm

ayáge né béhîd-te ádēn ámpē. ²¹ Bébēl nyé nímén mekan mésyā́l á yāl á dīn ádēm, áyāle béēbīí'ē ane awě alómé mē. ²² Nzé menkēmpě boŋ nláá bó nímén mam, né nímab mbéb méenyínnedé. Boŋ bɔɔb, béewóó'ē nzɔm ké póg áyāle nímab mbéb. ²³ Kénzéé awě akóó mē, akóó kááŋne echem Sán. ²⁴ Nzé menkēmbel ndín é mam átínté echáb éche mod ampée éēbēlēē mbéd, né nímab mbéb méenyínnedé. Boŋ bɔɔb bényíne mekan mésyā́l míme núbélé, ké nê bédii békóó mē, békóó-é echem Sán. ²⁵ Nén ádé álóned e'yale ábe é'ténlédé á mbéndé echáb bán, 'Nzɔm ké póg enkēmbáá eche békóóné mē.' ²⁶ Nwɔŋgene ábid wée Titée. Adii Edáádəŋ éche ébele' boŋ bad bésóŋtén mbále. Adé mébēē ne Titée mēlómē nyé mó, mó-'aá álā́ nyé mam tŋgene mē. ²⁷ Nyémpē nyéēhōb mam tŋgene mē áyāle nyédé ne mē se á mbooted.

16

¹ “Nlāŋge nyé nímén mésyā́l ábel boŋ nyéētinné mbíd. ² Bébídéd nyé á ndáb é mekáne. A mbále póndé ehúé' eche kénzéé awě áwūū nyé áwēmtēnnē aá móbenle Dyóɔb. ³ Bébēl nímén mam áyāle béēbīí'ē echem Sán béēbīí-'aá mē. ⁴ Nlāŋgé nyé nímén mam mésyā́l ábel boŋ nzé póndé epedé echě nímén mekan mébenladtē, nyéēkamtén bán menláá' nyé.

Nsán míme Edáádəŋ ébenlé

“Menkēnláá'é nyé nímén mekan á mbooted, áyāle membé ne nyé. ⁵ Boŋ bɔɔb, nkag wée mod awě alómé mē. Ké nê, nyé modmod nyéesedteé mē bánken 'Hée ékagké?' ⁶ Aláa ádé nílāŋgé nyé

mímén mekan ábéle ndutul elóge nyé á nlém-tê.
 7 Ne mbále, nlânge nyé nén meé, édé mbon nén bán ríke. Ayāle nzé meékii, né Nwōngene éepaá áwēn. Bon nzé nkii, mēlōmē nyé mó. 8 Ade ápéé, álūmēd bad bé nkōnsé nén aá mímab nsōnten míme béwánlé t̄ngene abel dé mbéb ne ábel mekan míme mésáá méet̄ngeneé. Béēsōnteneé-’ε nyaa echē Dyōb ákáadtéé. 9 Mmab nsōnten méet̄ngeneé t̄ngene mbéb, áyāle béedúbpéé me. 10 Méet̄ngeneé t̄ngene abel dé mekan míme mésáá, áyāle nkag wée Titée, nyéenyín-naá me ámpē. 11 Méet̄ngeneé t̄ngene nyaa echē Dyōb ákáadtéé, áyāle amaá nkamlene a nkōnsé akáad.

12 “Ndii nwóó ekud é mekan áláa nyé bon mímé mekan métom nyé áte. 13 Bon áde Edáád̄an é mbále épéé, ábēl nyēbíí mbále esyā́l. Eehóbénné echē kunze chēn. Dyam áde bēlā́’é mó d̄óó áhōbpē, álā́-’ε nyé mam míme mébenléd pón dé echē ehúé’ á’sō. 14 Achāgēd échēm edúbé ámín áyāle kéchéé éche áwógé áwēm ch̄óó mó-’ε álā́’é nyé. 15 Kéchéé éche echem Sáj áwóó édii échēm. Nē d̄óó ákás̄ bon r̄hōbē meé Edáád̄an étēd kéchéé éche r̄hōbē, éláá nyé.”

Ndutul ɛ̄t̄m menyinje

16 Héé Yesue ábádeé aá, “Mwāmp̄in mí pón dé nyéenyínné me ámpē, mwāmp̄in mí pón dé-’ε ámbid enē nyéenyín me.” 17 D̄óó donje dé be-mbapere bésēdtéé nhóg ne aníníí bánken, “Cheé áwémténé ahób, áláa syánē aá, ‘Mwāmp̄in mí pón dé nyéenyínné me ámpē, mwāmp̄in mí pón dé-’ε ámbid e nē nyéenyín me?’ Ahób-pe ámpē aá, ‘Ayāle nkag wée Titée.’ ” 18 Bēmbē bésēdté bánken,

“Cheé áwémténé ahób, áhób aá, ‘Mwämpin ní pón dé?’ Séesõητενεέ dyam áde áhóbεέ.”

19 Yesue ammad abii aá, béhede mó dyam aseded. Né-óó, anláá bó aá, “Dyam áde níhóbé meé, ‘Mwämpin ní pón dé nyéenyinné me ámpē, mwämpin ní pón dé-ε ámbíd e nê, nyéenyin me,’ dóo nyésedteé nhóg ne aníní-yε? 20 Ne mbále, nlange nyé meé, nyéēchií, nyéléb-pε, boη nkõηsé méwōg menyinge. Nyéēsudén, boη nímé nsuden métim menyinge. 21 Mmwaád awé ahede achyáá abelé ásuden áyāle eche pón dé e metake epedé. Boη nzé amaá achyáá abelé awóg menyinge, áyāle moonyoη achyáádté á nkõηsé. 22 Nê dóo édíí ne nyé. Nyésüdné bõõb, boη mēnyin nyémpē. Ene pón dé nímēn nlém mélōn ne menyinge, modmod éhēnlé-’aá nyé nímé menyinge akoben. 23 Ade échē epun épεé, nyéesedédté me dyamdyam. Ne mbále, nlange nyé nén meé Titée äbě nyé kéchéé échē nyésédté á dñn ádēm.* 24 Kóõηne bõõb nyéēhēdnēé mó chõmchõm á dñn ádēm. Nyéheden mó, nyéēküd äbel nén nímēn menyinge mélõg mbon.”

Yesue atómé nkõηsé áte

25 Yesue ambád ábē bembapεε aláa aá, “Mbēnlédé ngan áláa nyé ekud é mekan. Pón dé ehúε’ echē méebenlédté ngan. Mélāā-’ε nyé mekan tãηgene Titée, nyaa echē nyésõηtēnnē. 26 Echē epun, nyéēhedén mó kéchéé á dñn ádēm. Méetãgēn-naá mó aláa meé áwõηgen nyé, 27 áyāle Titée mwēn

* **16:23** Titée äbě nyé kéchéé échē nyésédté á dñn ádēm: donge á kálag áwóó Nzé nyésédté Titée kéchéé, äbě nyé chó á dñn ádēm.

adə́ə nyé. Adə́ə nyé áyāle nyêdə́ə me, nyêdúbpé-
'e bán mbídé áwē. ²⁸ Membíd wéé Titéé, nípē á
nkōṣé-te, bə́əb-pe ntədte nkōṣé, ntime ámbíd
wéé Titéé.”

²⁹ Héé abē bembapēé béhóbéé bán, “Ehóbe bə́əb
ngáne sésōṅtēnnē, weébēnládté ngan. ³⁰ Sēbíí bə́əb
bán ebíí mekan mésyā́l, éhédnád-taá bán mod-
mod áseded we dyamdyam. Nén ábélé sêdúbpé
bán ebídé wéé Dyōb.” ³¹ Dóó Yesue ákwēntanné bó
aá, “Nyêdúbpé bə́əb-e? ³² Nyénəne! Póndé ehúé',
emaá'-e ape, áde nyépāṅtēdtē áte. Mod téé atóm
mehélé wéé ábídé, nyétēdē mmēmpen. Boṅ ké nē,
meesaá mmēmpen, Titéé adé ne me. ³³ Nlāṅge nyé
nímén mekan ábēl nén nyébê nsan abé adé nyédíí
ne me. Nyéékūḍ metake á nkōṣé-te boṅ nyéwēd
nlém á abum. Ntómé nkōṣé áte.”

17

Yesue akánnédé eche yāl

¹ Ade Yesue amáá nímén mekan mésyā́l ahób,
dóó ánóné amín boṅ áhōbē aá, “A-Tê, póndé emaá
ape. Lúmed bad ehúmé éché awoṅ Mwän, ábēl
nén awoṅ Mwän mómpē álúmed ehúmé échōṅ.
² Ebágé mó kunze ákamlēn moosyā́l, ábēl nén ábe
bad bésyā́l ábe ebágé mó alongé áde déemaá'.
³ Alongé áde déemaá' ádíí nén bebíí we, mmōn
awē edé Dyōb á mbále, ne ábíí Yesu Krīstəə, awē
élómé. ⁴ Mbídté échōṅ ehúmé áwed á nkōṣé
amad adé nímádé nsón níme ebágé me. ⁵ Bə́əb-
pə́ó a-Sáṅ, bídéd échēm ehúmé áwed, wéé mmōṅ
édíí. Melemlem mé edúbé níme ménwōṅgē ne we,
nkōṣé ídē ahób bán níbootad.

Yesuε akánnédé ábē bembapεε

6 “Mbélé bad bé nkõjsé ábe ébágé me bébíi wε. Bébédéε ábõη, wembě me bó, bébélé-’ε ngáne ehóbé wεé bébel. 7 Bébíi bõõb bán kéchéé éche ébágé me, ébídé áwõη. 8 Nlángé bó mam mésyāāl míme élánjé me wεé rílaa bó, bédúbpé-’ε mímé mam. Bébíi ne mbále bán áwõη dõõ mbídé, bédúbpé-’ε bán wε-εé elómé me. 9 Nkânnad bó. Meekânnádté bad bé nkõjsé. Boη nkânnad bad ábe ébágé me, áyāle bédii ábõη. 10 Bad bésyāāl ábe bédé ábêm bédii ábõη, ábõη-’ε bésyāāl bédii ábêm, bébídté-’ε échêm ehúmé áwed. 11 Bõõb-põõ, mwāmpin mí póndé méebáá á nkõjsé-te ámpē. Boη bédii bédé á nkõjsé-te. Nhyag áwõη. Titée awě Asáá, kǎá bó á ngíne e dīn ádõη, dīn áde ébágé mé. Ngíne echě ébágé me ábel nén bébê mod nhóg, melemlem ngáne sóo-’ε ámpē dédíí mod nhóg. 12 Ade mbédé ne bó, menkǎá bó á ngíne e dīn ádõη, dīn áde wēmbεé me.* Nkǎngé bó, bó mod ké nhóg-ke eebõõ’é étõmεé mod awě êmmádté abé bán ábõõ ábel boη ébenled ngáne éténlédé á kálag e Dyõb. 13 Bõõb-põõ, nhyag áwõη. Nhóbe-’ε mímén mekan ngáne ndii rídé á nkõjsé ábel boη mímb b menyinje mélõn mbon, melemlem ngáne mímêm-me mélóné mbon. 14 Nlángé bó mam mésyāāl míme élánjé me wεé rílaa bó. Bõõb-põõ bad bé nkõjsé békǎá bó áyāle béesaá bad bé nkõjsé ámpē, melemlem ngáne me ámpē méesaá mod a nkõjsé. 15 Meehóbéé meé éhũd bó á nkõjsé-te, boη nhóbe’ meé ékǎá’ bó ábel boη Mod e Ebébtéd

* **17:12** Menkǎá bó á ngíne e dīn áde wēmbεé me: donje a kálag awóó á ngíne e dīn ádõη ménkǎá bad ábē ébágé me.

eébēlē' bó mbéb. ¹⁶ Béesaá bad bé nkõjsé melemlem nêngáne méesaá mod a nkõjsé. ¹⁷ Benléd echon mbále ábel bon béhel we abele. Echõn eyale édé mbále. ¹⁸ Nlómé bó á nkõjsé-te melemlem nêngáne wémpē wénlõmmē me á nkõjsé-te. ¹⁹ A etútú échâb membě echem yál ábele we ábel bon bõmpē bébe échab yál ábel bon békon we abele.

Yesu akánnédé bad ábê béedúbé mó bésyāā

²⁰ “Meekánnádté ábēm bembapεε bēnpεn bon nkánnad káõne bad ábe bédúbpé me áyāle mam míme béwógé áwāb. ²¹ Nkánne' meé bó moosyāál bébê mod nhóg. A-Tê, bó moosyāál bébê mod nhóg ne sóo, melemlem nêngáne édíí ne me, me-'ε mbé ne we. Bébê mod nhóg ábel nén nkõjsé rídúbe bán we-εé elómé me. ²² Ehúmé éche ébágé me, me-'ε mbagé bó. Mbagé bó ábel bon bébê mod nhóg melemlem nêngáne sóo dédíí mod nhóg. ²³ Ndé mod nhóg ne bó, we-'ε edé mod nhóg ne me. Nén déběl békõn mod nhóg abé. Békon mod nhóg abé ábel bon nkõjsé mbíi bán we-εé elómé me, bébíi-'ε bán edáá bó melemlem nêngáne édáá me. ²⁴ A-Tê, ebagé me bó, bébê wéε rídíí, ábel bon bényín echēm ehúmé. Wembě me ehúmé áyāle wendān me se á mbooted mé nkõjsé. ²⁵ A-Tê, we-εé ebele mam míme méesaá. Nkõjsé méebíí'ε we, bon mbíí we, ábén-ne ámpē bébíí bán we-εé elómé me. ²⁶ Mbelé bébíí we, mēbēl-le ámpē ábel nén edānje échě édáá me ébê bó áte, me-'ε ámpē mbê ne bó.”

18

Békóbé Yesu

(Mat 26.47-56; Mak 14.43-50; Luk 22.47-53)

1 Ade Yesue amáá akáne, bóobe ábē bembapεε bēnhidé, béchābē mwă edíb a Kidron ámín. Nzag embé áhed, bénsāl áwēd-te. 2 Judase, ntúré awē Yesue ambíí ádē abwóg á hōm, áyāle Yesue ne ábē bembapεε bēmmētén aladen áhed. 3 Né-óó, Judase antómén echon é sánze ne bembaledε bé Ndáb-e-Dyōb ábe beprise bémbáá ne Befarisia bēnlōmmē, békē wée Yesue ábédé. Abē bad bēnchōd e'kag, bēwálé e'trúkán ne bwēm é' nzum. 4 Yesue ammād mam mésyāāl míme mébenléd ne mó abíí, ké nê, ambídéd yāl áwed, ásēdēd bó aáken, “Nzé nyéhedeé?” 5 Bēnkwentén mó bán, “sēhede Yesue, mod a dyad á Nazaret.” Yesue ankwentén bó aá, “Mε-εé ndé mó.” Judase ntúré awē Yesue ambé áhed ne ábē bad. 6 Ade Yesue áhóbé aá, “Mε-εé ndé mó,” bēntimén mbíd, békwe áse. 7 Hē dōo Yesue ásedtēé bó ámpē aáken, “Nzé nyéhedeé?” Bēnkwentén bán, “Yesue a dyad á Nazaret.” 8 Héε Yesue ákwentanné bó aá, “Nlángé nyé mεé, mε-εé ndé mó. Né-óó, nzé nyéhede mε, nyétēdē ábén bad ábe bédé ne mε, békag.” 9 Nén dēmbenléd álóned e'yale ábe ánhōbpē aá, “A-Sán, átíntē e bad ábe wēmbéé mε, meebódeé ké nhóg.” 10 Simōn Petro anwálé nkwaté. Héε ádólé míme nkwaté bon átōmtē', ásēlē etúu é ekáá é mbáá é mbaledε awē prise ambáámbáa. Ane mbaledε abédé dín bán, Malkuse. 11 Yesue anláá Petro aá, “Timéd nkwaté á abám. Nédē, meetēngeneé metuné míme echem Sán átíínédé mε akud-ε?”

Békééné Yesue wée Anase

12 Héε échē echon é sánze ne awáb mod ambáá nchoo ne bembaledε bé bad bé Israel békóbé Yesue béhan mó. 13 Bénsēbē mó akεen wée Anase.

Anase abédée sán-kalé awě Kaifase awě abédé prise ambáámbáa nímê mwě. ¹⁴ Kaifase ne, mó ambě bad bémháá bé Israel elébé aá ébóó bán mod nhóg áwê á nló m bad bésyāāl.

Petro abáá Yesue á yāl

(Mat 26.69-70; Mak 14.66-68; Luk 22.55-57)

¹⁵ Simōn Petro ne mbapεε ampée behídé'áá Yesue. Prise ambáámbáa ambíí ane mbapεε, né-óó ane mbapεε ansól eyáde éche prise ambáámbáa wée bēnsōlēnnē Yesue. ¹⁶ Petro pen anlyǎg á mmwe mé e'ké. Dóó ane mbapεε awě prise ambáámbáa ámbíí'é átímé ámbíd á mmwe, ákālēn ngōndéε echē enōné'áá mmwe boŋ ásōltē Petro á eyáde-tē. ¹⁷ Ene ngōndéε ansēdéd Petro aáken “Kíné wémpē weesaá mbapεε nhóg awě ane mod-ε?” Petro ankwentén mó aá, “Aáy, meesaá.” ¹⁸ Bōob-pōó, ahéb démbē. Né-óó, bembāledε ábe prise ambáámbáa ne bembāledε bé Ndáb-e-Dyōb bēnkonéd muú betyéém áhed bēwāle'. Petro mómpē ambé áhed, atyéém áwālē muú.

Prise ambáámbáa akáadte Yesue

(Mat 26.59-66; Mak 14.55-64; Luk 22.66-71)

¹⁹ Prise ambáámbáa esēdté'áá Yesue tǎngene ábē bembapεε ne ádē ayáge. ²⁰ Yesue ankwentén mó aá, “Mam mésyāāl níme rílánǎg'áá bad nhóbé'áá mó á nhéné. Ayáged ádēm ásyāāl'-ε, abédé á Ndáb é mekáne ne á Ndáb-e-Dyōb wée bad bé Israel bésyāāl bēladnéé. Meéhóbéé'-ε dyamdyam á kuntē. ²¹ Cheé-ō ésedtεé me ámpē. Sedéd bad ábe bēnwōg mam níme rílánǎg bó. Bébíí mam níme ríhóbé.” ²² Ade Yesue áhóbé nê, mbāledε nhóg ambōm mó abén ahób aá, “Chán éhele éhōbē' nê

wée prise ambáámbáa?” ²³ Yesue antimtén mó aá, “Nzé nhóbé dyam áde déetângene, ehób dó moosyáál áwôg. Boη nzé édé bán nhóbé dyam áde átângéné, cheé ékáá boη ébomé me?” ²⁴ Dóo Anase áhóbé aá, béκεεν Yesue wée Kaifase, prise ambáámbáa. Yesue ambé abé á mehaη.

Petro abáá Yesue á yäl ámpē

(Mat 26.71-75; Mak 14.69-72; Luk 22.58-62)

²⁵ Bóob-póó, Simōn Petro ambé atyéém áhed áwālē muú. Héε bad ábe bémbē áhed bésedteé mó bán, “Kíné wēmpē weesaá mbapeε nhóg awē ane mod-ε?” Petro antán aá, “Aáy, meesaá.”

²⁶ Mbaledε awē prise ambáámbáa nhóg, mwānyan móo Petro ánsēnlē etúu, anchágéd ehób ámīn, aláá Petro aá, “Kíné meenyíneé nyúmō á nzag-tē-yε?”

²⁷ Petro antán ámpē. Abwōg-ábwōg, nchóm a kúb antón.

Payledε akáádté Yesue

(Mat 27.1-2, 11-14; Mak 15.1-5; Luk 23.1-5)

²⁸ Bad bé Israel bēnhidnéd Yesue á ndáb wée Kaifase béκēēn mó á eyáde e nkamlene ambáá. Nén ábédé epog é mbwembwε. Bēn bēnkēnsónlé á ndáb-te ábán nén béenyínnád mbinde á’sō é’ Dyōb

* ábel bedyē Ngande e Nnyime-ámīn. ²⁹ Né-óó, Payledε nkamlene ambáá a bad bé Roma, ambíd e ebwóg áke atán bó, ásedtē bó aáken, “Awusé áhéé nyéhóbé bán anén mod abelé?” ³⁰ Bēnkwentén mó bán, “Nzé anén mod enkēmbé ebébtéd é mod, né

* **18:28** Bad bé Israel bēndūbē nén bán nzé mod aslé á ndáb e mod awē eesē mod a Israel, né awógté yäl mbinde. Ne bó, enén ndīn e mod ebágáá mbinde á’sō é’ Dyōb epun saámbe. Enén pónde esyáál eéhele’áá-se adyé Ngande e Nnyime-ámīn.

séēbagēé mó áwōñ mekáá.” ³¹ Paylede anláá bó aá, “Nyé bēn nyétēd mó, nyébenled mbéndé echēn nyékáad mó.” Hēe bad bé Israel bēlāngēé mó bán, “Séewóó’ē kunze áwúu mod.” ³² Nén dēmbēnléd álóned e’yale ábe Yesue ánhōbpē álúmed nyaa e kwééd eche áwēē. ³³ Paylede ansól á ndáb-te ámpē, áchāg Yesue, ásēdēd mó aá, “Wē-ēé edé kēñ e bad bé Israel-le?” ³⁴ Yesue ankwentén aá, “Mmōn-ēé ehóbe nē ngé bad bēmpēe bóo bēlāngē wē mam á yāl echēm?” ³⁵ Paylede ankwentén aá, “Ndé mod a Israel-le? Abōñ bad ne beprise bēmbáá bóo bēbágé wē áwēm mekáá. Cheé ébélé?” ³⁶ Yesue ankwentén aá, “Mmēm nkamlēn méesaá á nkōñsé wēn. Nzé nímēm nkamlēn mémbe á nkōñsé wēn, né ábēm bembalede bēwān, ábel nēn bad bēebagé me á mekáá mé bad bé Israel. Boñ nímēm nkamlēn méesaá mé nkōñsé.” ³⁷ Dóo Paylede ásedtēé mó aá, “Nédē edé kēñ-e?” Yesue ankwentén aá, “Wē-ēé ehóbé wēé ndé kēñ. Nzōm echē ekáá boñ béchyáá me, mēpē á nkōñsé wēn, edii ábíd mbōñ e mbále. Mod ké ahéé awē adé mod a mbále awóglan me.” ³⁸ Paylede ansedéd mó aá, “Cheé édé mbále?”

Bán Yesue atāngéné awé

(Mat 27.15-31; Mak 15.6-20; Luk 23.13-25)

Ade Paylede amáá mó aseded nēn, ambíd á ebwóg ámpē ake atán bad bé Israel, anláá bó aá, “Meekóbnēé anén mod awusé ké ahóg áde méhōbpē meé bēwúu mó. ³⁹ Boñ nyēwóó elem nēn bán, ntāngéné nyé mod a mbwog nhóg abídted á pónde e Ngande e Nnyíme-ámin. Nyédáá bán mbídted nyé kēñ e bad bé Israel-le?” ⁴⁰ Bēnkwentén mó ne e’saád bán, “Aáy! Séēhēdēē

mó. Bídtéd sé Barabasε.” (Barabasε abédé-’ε nchíb ambáá.)

19

¹ Dóo Payledε áhóbé aá béke bébom Yesue. ² Sánze éntēd ngen é mechă bélónj ekóté éche émbē née ekóté é kâη, béhē mó chό á nló, béhé-’ε mó mengombe míme méyage’ á yǎl, míme méwagné mengombe mé kâη. ³ Bésídté’áá mó benben, béhōbē bán, “A kâη e bad bé Israel, edúbé ébê ne wε.” Bébómé’áá mó kááηne mebén. ⁴ Payledε ambíd á ebwóg ámpē, aláá ábê bad aá, “Nyénone’, mbídtaad nyé mó á ebwóg, ábel nén nyébii bán, meekóbnεé mó awusé ké ahóg.” ⁵ Né-óó, Yesue ambíd á ebwóg ne ekóté e mechă á nló, megombe míme méyage’ mó-’ε mébé mó á yǎl. Héε Payledε álanγεé bó aá, “Nyénone’ awedé mod-e nén!” ⁶ Ade beprise bémbáá ne bembaledε bé Ndáb-e-Dyōb bényíné mó, bēmbotéd abón bán, “Bomé mó á awog! Bomé mó á awog!” Payledε anláá bó aá, “Nyé bēn nyétéd mó, nyébome mó á awog, áyāle meekóbnεé mó awusé ké ahóg.” ⁷ Abê bad bēntimtén Payledε bán, “Sēwóó mbéndé echē ehóbe nén bán atánjéné awé áyāle ahóbé aá módii Mwán a Dyōb.”

⁸ Ade Payledε áwógé nén, mbwóg mēnnabé mó akób. ⁹ Antim ámbíd á eyáde-tē ámpē, ásedēd Yesue aá, “Héé ébídé?” Bon Yesue enkēnkādénne mó. ¹⁰ Né-óó, Payledε anláá mó aá, “Weéhēdēε me akwenten-ε? Weebii’ é nén wεé nwóó kunze áhób meé béchene wε, nwóη-’ε kunze áhób meé bébome wε á awog-ε?” ¹¹ Yesue ankwentén mó aá, “Weewóó’ é kunze ké póg ámín echēm ésebán

Dyöb ábágé wε ene kunze. Né-óó, mod awě abagé me áwōη mekáá abelé mbéb míme rítómténé achab ámín.” ¹² Ade Payledε áwógé nê anhěd nzii áte de Yesuε, boη ábê bad bēnhē e’saad bán, “Nzé etědté anén mod né weesaá nsón awě Kaisεε. Kénzée awě ahóbé aá, módē kēη né atēηgan Kaisεε.”

¹³ Ade Payledε áwógé nén, ambídén Yesuε á ebwóg, ádyēē atii dé nkamlen. Adē hōm wée ándyεé’ε béchágé’áá dó bán, Eyáde éche bēnábndé Meláá. A ehób é Hibru béchəge bán, Gabata. ¹⁴ Bóob-póó, nén ábédé á epun é mboηsén é Ngande e Nnyíme-ámín, dyam kəd. Payledε anláá ábê bad bé Israel aá, “Echen kēη chō nén!” ¹⁵ Abê bad bēnhē e’saad bán, “Wúú mó! Wúú mó! Bomé mó á awəg!” Héε Payledε ásedtée bó aá, “Mbome echen kēη á awəg-ε?” Bepriε bémbáá bēnkwentén mó bán, “Séewóó’ε kēη empée étōmεé Kaisεε.” ¹⁶ Dóó Payledε ábágé Yesuε áwab mekáá ábome mó á awəg.

Bébómmé Yesuε á awəg

(Mat 27.32-44; Mak 15.21-32; Luk 23.26-43)

Né-óó, bēnhidné de Yesuε. ¹⁷ Yesuε mwēn ampém áde awəg bootya á dyad-tē ákēēn dó hōm áde béchəgeé bán, “Hōm dé Ebóηgél é Nló,” áde béchəgeé á ehób é Hibru bán Golgota. ¹⁸ Ahed-tá bēmboméé mó á awəg. Bēmbomé bad bébe bémpēe á awəg áhed, nhóg pəd póg, aníníí’ε pəd eníníí, Yesuε abé áfíntē.

¹⁹ Payledε antél á abámbé aá, “Yesuε, mod a dyad á Nazaret, kēη e bad bé Israel,” abádé á awəg á nló-mín wée Yesuε. ²⁰ Wée bēmboméé Yesuε á awəg démbē benben ne Jerusalem. Né-óó, bad híin bēnlāη chōm éche bēntenlé. Chōm éche ántenlé,

antel ch3 á eh3b é Hibru, átēl é eh3b é Latin, ne é eh3b é Grikia. ²¹ Bepriε bémbáá bénlāā Payledε bán, “Wεétēlē wεé ‘Kêη e bad bé Israel,’ tēl wεé, ‘Anén mod ah3b3 áá, mε-εé ndé kêη e bad bé Israel.’” ²² Payledε anláá bó áá, “Ch3m éche rítélé mmaá atel.”

²³ Ade sánze émáá Yesuε abome á aw3g, béntēd éche mb3té, békabtéd ch3 áte monje méniiin, bó mod té atéd akab ah3g. Béntēd kááηne mb3té eche behágkē áte. Ene mb3té bēnkēmbaá’3 ch3 h3mh3m. Embé bootya ámīn ápe ásē enkēnw3ngé mbom. ²⁴ Héε bélāηgεé nh3g ne aníní bán, “Syánē deésālē ch3. Désid mbambú ányín mod awē átēd ch3.” Nén dēmbenléd álóned e’yale ábe é’ténlédé á Kálag e Dy3b n3n bán,

“Bēn ne bēn bēnkáb échēm mb3té.

Bēnsíd-te mbambú ákab nímēm nsob.”

Né-33, nē d33 échē sánze ēmbenlé. ²⁵ Yesuε nyaá, nyaá mwānyāη, Maria awē abédé Klopasε mwaád ne Maria Magdalεne bentyēēm benben ne á aw3g áde Yesuε. ²⁶ Ade Yesuε ányiné nyaá ne mbapεε awē ád33 b3tyéémé áhed, anláá nyaá áá, “Á-nyāη, mwān wε nε.” ²⁷ Héε álāηgεé ane mbapεε m3mpē áá, “Nyoó ne.” Bootya ene p3ndé ane mbapεε antéd Yesuε nyaá, átimēn mó áwē ndáb.

Yesuε awédé

(Mat 27.45-56; Mak 15.33-41; Luk 23.44-49)

²⁸ Ambíd e nē, Yesuε annyín áá mekan mésyāāl mémáá. Alóned-te ngáne éténlédé á Kálag e Dy3b anh3b áá“Píd ek3b3 mε.” ²⁹ Kúmbe embé áhed, ebéntéd é mīm énl3g áwēd-te. Né-33 bēnt3d3 kuchá á ebéntéd é mīm-tē wē, bés3m á nt3η rí ngen e hís3b, behē mó á nsal. ³⁰ Ade Yesuε ámwédé

ebéntéd é m̄im chē, anhób aá, “Emáá.” Héε ámógé n̄ló, awé-’ε.

Bésóó Yesue akon̄ á aheb

³¹ B̄oob-p̄oó, échê epun ébédé Mbwe mé mbon̄sén mé mbwe-mé-nkóme-áte. Bad bé Israel-le béehede’aá bán ndim n̄íbé n̄íbê á awog á mbwe-mé-nkóme-áte, tan̄ge ngáne échê epun é nkóme áte étōmtēnnē edúbé abé. Né-óó bēntān Paylede bán, ábe bó kunze ábóg bad ábe bēbómme á awog mekuu ne áhúd bó á awog. ³² Né-óó, échê sánze ênk̄é ébóg mekuu n̄ime bad ábe bēmboméé bóobe Yesue á awog. Bēnsēbē n̄ime nhóg abóg, bēbóg-ke n̄ime aníníí. ³³ Bon̄ áde bēpédé wéε Yesue bēntān néε amáá awé. Né-óó, bēnkētogénné mó mekuu abóg. ³⁴ Ké nê, sánze póg enson̄ mó akon̄ á aheb. Abwōg-ábwōg mekií ne mendíb bēmbíd. ³⁵ Mod awě annyín néε n̄imén mekan mébénlédé, abídé mbón̄, eche mbón̄ edé-’ε mbále. Abíí n̄én aá, mókale’ mbále, ahóbe-’ε n̄imén mam ábel n̄én nyémpē nyédúbe. ³⁶ Mmén mam mébénlédé álóned e’yale ábe é’ténlédé á Kálag e Dyōb n̄én bán, “Béebógké ehid échē ké ehóg.” ³⁷ Eténlédé á kálag e Dyōb ámpē n̄én bán, “Bénōn̄ ane awě bésóó akon̄.”

Bélimmé Yesue

(Mat 27.57-61; Mak 15.42-47; Luk 23.50-56)

³⁸ Ambíd enê, Josebe awě ambíd á dyad á Ari-matia, anláá Paylede aá, ábe mó kunze áted ndim n̄ime Yesue. Josebe abédéε mbapeε awě Yesue, bon̄ énkēmbídédte yāl áwed áyāle abáá’áá bad bé Israel. Paylede ambě mó kunze áted ndim n̄ime Yesue. Né-óó, ank̄é Yesue ndim atéd. ³⁹ Nikodemuse

awě ansébé Yesue ake dé anyín nkuu, bó Joseb bēnkě. Bédêkě anwálé mekúle míme bēnabnadté ndim mímé bēbēnlé Mía ne Alɔs.* Adê dyǒg ábédé dyam móom mé kílo meláán ne kílo étáan. ⁴⁰ Béntēd ndim míme Yesue, békāān mó mbóm ne míme mekúle. Nén dǒo elem é bad bé Israel áboṅsen ndim émbēē. ⁴¹ Bǒǒb-pǒǒ, nzag embé wée bēnwū'é Yesue. Soṅ e ekóólé ebédé á nzag-tê wê, echê bēnkēmpaá ndim ké nhóg abane áte. ⁴² Né-ǒǒ, ngáne échê epun ebédé mbwε mé mboṅsén mé mbwε-mé-nkóme áte, ene soṅ-'ε ebé benben, bēmbané Yesue ndim áwēd-te.

20

Yesue apuúdé

(Mat 28.1-8; Mak 16.1-8; Luk 24.1-12)

¹ A Sǒndé, epǒg é mbwεmbwε, áde ehíntén émbēē ébé, Maria Magdalene ankě á soṅ wée bēnlīmēē Yesue. Ade ápédé áhed, antán nēe bēhúdé aláá áde bēnkōlennē nsəl ní soṅ. ² Héé átómé mehélé, boṅ áke atán Simōn Petro ne mbapεε ampée awě búmō bēbédé. Ane mbapεε abédée mbapεε awě Yesue ándəṅgé. Dǒo Maria álāṅgέé bó aá, “Béhúdé Sāṅgwée ndim á soṅ-tê, séebíi-'áa wée bēbánné mó.” ³ Dǒo Petro bó ane mbapεε bēhídté boṅ békág á soṅ. ⁴ Bó moosyáál bényágté'áá, boṅ mbapεε aníní anyǎgté'áá tómaa Petro. Né-ǒǒ, ansébé ape á soṅ. ⁵ Anwúlén ásē ásad díd á soṅ-tê, anyín mbóm éche bēnkaánné Yesue, boṅ enkēnsónlé á soṅ-tê. ⁶ Simōne ahúé'áá mó ámbíd, apedé-'áa pεén asól-ε á soṅ-tê. Antán mbóm éche bēnkaánné Yesue

* **19:39** Alɔs: Abédée mekúle míme bēbēnládtáá ánabned ndim.

áhed. ⁷ Antán-ne abad áde bēnkaánné Yesue nló. Adé abad déēbédeé hōm ahóg ne mbóm, dēndān áte pēd póg. ⁸ Héē aníní mbapēē awē ansébé apē á sonj mómpe ásólé áwēd-te. Annyín ábē bwēm, adúbé-’ε. ⁹ Ké nê, bēnkēnsónténné chōm éche éténlédé á Kálag e Dyōb nén bán Yesue atāngéné apuu. ¹⁰ Ámbīd é nê, ábē bēmbapēē bēntīm ámbīd á ndáb.

*Yesue alúmté Maria Magdalene yāl
(Mat 28.9-10; Mak 16.9-11)*

¹¹ Bōob-pó Maria anlyǎg á nsəl ní sonj, áchyeé’. Ade áchyeé’ é nê dōo áwúnlé ásē, bonj ásadé dīd á sonj-tê. ¹² Asad áde ásádé dīd, annyín ángel ébe. Echê ángel énhē e’púpe é’ mbóté, édyēē wēē bēnnaádté ndim míme Yesue. Nhóg andyēé á pēd e nló, aníní-’ε á pēd e mekuu. ¹³ Echê ángel énsedéd Maria bán, “A-mmwaád, cheé échye’é?” Anláá bó aá, “Nchye’ áyāle bétédé ndim míme awem Sāngwéé, meebíi-’áa wēē bébánné mó.” ¹⁴ Ade ámáá ahób nê, ankunnéd, anyín néē mod átyéémé áhed. Ane mod abédéē Yesue bonj enkēmbíí’ é aá Yesue mó adé. ¹⁵ Yesue asedéd mó aá, “A-mmwaád, cheé échye’é? Nzéé éhedéé?” Maria anwémtén aá mod awē abele nsón á nzag-tê wē mó adé. Né-ōó, anláá mó aá, “A-sān, nzé wε-εé etédé mó ndim, eláá me wēē ébánné, ábel bonj níke rítéd mó.” ¹⁶ Héē Yesue áchəgēé mó aá, “A-Maria!” Dōo Maria ákunné yāl áwē bonj áhóbé á ehób é Hibru aá, “Rabóni!” (awē adé nén bán, “Meléede”). ¹⁷ Yesue anláá mó aá, “Weésitán me, áyāle meétíméé ámbīd wēē Titéε. Bonj kǎg wēē ábēm bēmbapēē, ábēm baányan, éláá bó wεé, ntime’ ámbīd wēē echem Sān, awē adé káōne echen Sān. Mó adé Dyōb

ádêm, abé-'ε ádēn.” ¹⁸ Né-ῶó, Maria Magdalene ankë, aláá bembapεε aá, mónyínē Sánḡwée. Anláá-'ε bó mam mésyāāl níme álánḡé mó.

Yesue alúmté ábē bembapεε yāl

(Mat 28.16-20; Mak 16.14-18; Luk 24.36-49)

¹⁹ Echê epun é Sôndé chēn, ngukél, bembapεε ábe Yesue bēnladén áte á ndáb-te bépēn-ne ekob áyāle bébáá'áá bad bé Israel. Yesue ampë, atyéém átíntē echâb, aláá bó aá, “Nsaḡ mǐbê ne nyé.”

²⁰ Ade áamáá ahób nê, anlúméd bó níme mekáá, alúméd-te bó aheb. Bembapεε bébédé menyinḡe bwâmbwam ânyín Sánḡwée. ²¹ Dóó Yesue álánḡéé bó ámpē aá, “Nsaḡ mǐbê ne nyé. Ngáne Títée álómé me, melemlem nê dóó mémpē nílómeé nyé.”

²² Ade áamáá ahób nê, anhébé bó peme, aláá-'ε bó aá, “Nyékob Edáádāḡ éche Esáá. ²³ Kénzéeé awë nyéláḡséné mbéb, né níme mbéb níkúdé alagsen. Kénzéeé-'ε awë nyéelagsénéé níme mbéb, né méekudéé alagsen.”

Yesue alúmté Tōmasε yāl

²⁴ Tōmasε mbapεε nhóg átíntē e bembapεε dyóm ne bébe ábe Yesue, awë béchágé'áá bán Nhéd, enkēmbáá ne baáb áde Yesue ápédé. ²⁵ Né-ῶó, áde ahúú baáb bēnlāā mó bán, “Sēnyíne Sánḡwée.” Bon anláá bó aá, “Esebán nínyíne meban níme bēmboméeé mó tōne á mekáá bon ísōm-me e'mii á meban-tê áwed, mǐbīd-te ekáá áwē aheb, méedúbéeé mbéd.”

²⁶ Ambīd e e'pun waam, bembapεε bēnladén áte á ndáb-te ámpē. Tōmasε mómpē ambé áhed. Bēmpēn e'kob, bon Yesue ampë, atyéém átíntē echâb. Anláá bó aá, “Nsaḡ mǐbê ne nyé.” ²⁷ Héε

álângeé Tōmase aá, “Sōm e’mii á meban hén. Nōné’ me mekáá, éhyene-’ε ekáá, ébid me chó á aheb. Sóg mod abé awě eedúbpé’, dúbé!” ²⁸ Tōmase ankwentén mó aá, “A-Sáá awēm, a-Dyōb ádēm.” ²⁹ Yesue anláá mó aá, “Saá áyāle ényíne me dōó édúbpé-ye? Nnam ne bad ábe béenyíne boη kénê, bédúbe.”

Nzam echě ekáá boη bétéle’ enén kálag

³⁰ Yesue amběł ekud é menyáké émpēe éche ábē bembapεε bémbēē ásē éche béeteleé á kálag-tē wén. ³¹ Boη nímén mésyāāl méténlédé ábel nén nyédúbe* bán, Yesue mó adé Ane-awě-Béwógté, Mwān a Dyōb. Nzé nyédúbpé-’ε mó, né nyékudé alongé áde déemaá’ á dīn ádē.

21

Yesue alúmté abē bembapεε yāl ámpē

¹ Ambíd e nímén mésyāāl, anlúmed ábē bembapεε yāl ámpē á nkin mé edib é Tiberia. Nyaa echě ánlūmédtē bó yāl ebédée nén, ² epun ehóg Simōn Petro, Tōmase (awě béchágé’áá Nhéd), Nataniēle (awě ambíd á dyad á Kana á mbwóg e Galilia), bán ábe Zebediε, ne bembapεε ábe Yesue bémpēe bébe, bēnladén hōm ahóg. ³ Héε Simōn Petro álângeé bó aá, “Nkag súu akób.” Bēntimtén mó bán, “Sémpē séēhíd wε.” Né-óó, bēnhidé béke bésól á bōle-tē. Boη nímē nkuu nsyāāl bēnkēnkóbpé chōmchōm.

⁴ Ade bīn é’bóótédé akéle, Yesue antyéém á nkin mé edib. Boη ábē bembapεε bēnkēmbíí’ε

* **20:31** Nyédúbe; donje á Kálag dé e’só awóó nyébê nyédúbe.

bán mó adé. ⁵ Dóo Yesue ásedtée bó aá, “A-běd, nyėėkōbēē chōmchōm-ε?” Bėnkwentěn mó bán, “Aáy, séekōbēē.” ⁶ Anláá bó aá, “Nyėbwēm mbínzė á pėd e ekáá é mbáá é bǎle, nyėėkōb.” Né-ǎó, bėmbwēm mbínzė ene pėd. Bėnkėnhenlė ene mbínzė adol áyāle sũu ěmbē áwėd-te bwāmbwam. ⁷ Dóo mbapεε awě Yesue āndəŋgė áhóbėé aá, “Sāŋgwėé mó adé!” Awóg áde Simōn Petro áwógė bán, Sāŋgwėé mó adé, anhé megombe á yǎl (áyāle anhūd bwēm á yǎl). Dóo áhėbė á edĩb-te. ⁸ Boŋ ábíní bembapεε bėmpǵ á nkin á bǎle-tė, bėdolė mbínzė. Ene mbínzė enlōn ne sũu. Wėε bėmbĩdėnnē bǎle āpε á nkin dėnkėnchabpė, ábėdė dyam mbwókkel e méta póg. ⁹ Ade bėpėdė á nkin bėntān muú mé mekāŋled. Sũu ěbėdė áwėd ámĩn ne ewεle. ¹⁰ Yesue anláá bó aá, “Nyėhyεene’ donge á sũu áde nyėkóbė bǎob.” ¹¹ Né-ǎó, Simōn Petro ansól á bǎle-tė, ādol ene mbínzė á nkin. Sũu ěmbáá ěnlōn ene mbínzė áte. ěbėdė mbwókkel móom métaan ne ěláán. Kėnėε ěchė sũu ěmbuú’ė áte, ene mbínzė enkėnsalėé. ¹² Yesue anláá bó aá, “Nyėhyε nyėdyė ndyėéd.” Abė bembapεε bó modmod enkėnchu’ė mó asėded aáken, “Nzė-módė ědíí?” Bėmbĩ bán, Sāŋgwėé mó adé. ¹³ Dóo Yesue átėdė ewεle boŋ ábagė bó. Amběl melemem ne sũu. ¹⁴ Nėn ábėdė ngen echě ělontėné ěláán, echě Yesue álúmtė ábė bembapεε yǎl á póndė echě ámáá apuu.

Yesue asėdtė Petro ké adǎó mó

¹⁵ Ade bėmáá ndyėéd adyė, Yesue asėdėd Simōn Petro aá, “A-Simōn, mwǎn a Jōn, edǎó mε tómaa ábėn bembapεε-yε?” Simōne ankwentěn aá, “ěε, a-Sāŋ, ebíí wėé ndǎó wε.” Yesue anláá mó aá, “Tǎgėn

ábêḿ bǎn bé rídyɔŋ ní mbód.” ¹⁶ Yesue ansɛdéd mó ngen éche élónténé ébe aá, “A-Simɔn, mwǎn a Jɔn, edǎá me-ye?” Petro antimtén mó aá, “Ɛe, a-Sǎŋ, ebíí wɛ ndǎá we.” Yesue anlǎá mó aá, “Tɔgén nímêḿ rídyɔŋ ní mbód.” ¹⁷ Yesue asɛdéd mó ngen échê élónténé élǎán aá, “A-Simɔn, Mwǎn é Jɔn edǎá me-ye?” Yǎl enhóó Petro áte áde Yesue ásédte mó ngen échê élónténé élǎán aaken, “Edǎá me-ye?” Né-ɔó, anlǎá Yesue aá, “A-Sǎŋ, ebíí mam mésyǎǎl. Ebíí wɛé ndǎá we.” Yesue anlǎá mó aá “Tɔgén nímêḿ rídyɔŋ ní mbód. ¹⁸ Ne mbále, nlânge we nén meé, áde ébédé etum, mmɔn epúdé’áá abad, ékǎg-ke kéhéé wɛé édǎá. Bon áde wéchunné wɛsǎd mekáá, mod ampée awǎád we abad, ákɛɛn-ne we wɛé wéedǎá’é akɛ.” ¹⁹ (Yesue anhób nê álúmed nyaa e kwééd echê Petro áwɛɛ, álúmed ehúmé é Dyɔb.) Ambíd e nê dǎó Yesue álângeé mó aá, “Hídé me.”

Yesue ne mbapɛɛ awɛ ádǎá

²⁰ Dǎó Petro ánóné ámbid bon ányĩnê’ nɛɛ mbapɛɛ ampée áhídéé bó. Ane mbapɛɛ abédéɛ mbapɛɛ awɛ Yesue ándɔŋgé. Mǎó andyɛé Yesue á akéb á pǎndé éche bédyágé’áá ndyééd ngukél, bon ásɛdéd Yesue aá ken, nzé-módé ǎsǎm mó. ²¹ Anyín áde Petro ányíné’áá mó, anhób aá, “A-Sǎŋ, chán-náa anén mod?” ²² Yesue ankwentén mó aá, “Nzé nhede meé ábê á alongé kǎáŋne pǎndé echê mépɛé, chán nê ánóné we? Hídé me.” ²³ Né-ɔó, énkánléd átíntê e bad ábe béhídé’áá Yesue hǎm ásyǎǎl nén bán ane mbapɛɛ éewǎá, kénɛɛ Yesue énkénhóbpé aá, éewǎá. Anhób dásǎ aá, “Nzé nhede meé ábê á alongé kǎáŋne pǎndé echê mépɛé, chán nê ánóné we?”

24 Ane mbapεε mó abíde mbónj áyāl e nímén mekan, mó-'aá atelé mó ásē. Debíí-'ε bán, kéchéé echě áhóbé édé mbále.

Asóg á kálag echě Jōne

25 Ekud é mam émpēe édé éche Yesuε ábélé. Nzé bénhōb bán bétele' mésyāāl ásē, ahóg ámbid e ádíńí, nwémtan mεé né nkōjsé méekwogké échē kálag ahé áte.

lxxx

Melǎ Mékōōlē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 29 Jan 2022

0143729f-907e-5098-b6ce-63b1629b8e48